

LATOUR VEYER

PE ANONS RWAYONM ZEOVA



LARTIK LETID

1-7 ZILYET

**Akonplir ou rol
konman en
predikater**

PAZ 3 • KANTI: 103, 102

8-14 ZILYET

**Eski ou “zele pour
fer dibyen”?**

PAZ 8 • KANTI: 108, 93

15-21 ZILYET

**Ranforsi ou maryaz
par annan en bon
kominikasyon**

PAZ 14 • KANTI: 36, 87

22-28 ZILYET


**Paran ek zanfan,
kominik avek
lanmour**

PAZ 19 • KANTI: 88, 3

29 ZILYET-4 OUT

**Protez ou leritaz par
fer bann bon desizyon**

PAZ 26 • KANTI: 14, 134






LONN, LANGLETER

KOUVERTIR: Bann ser pe pres avek en marsan dan nor was Lonng par servi piblikasyon dan langaz Gujarati

■ Bann kongregasyon langaz etranze
■ Bann group langaz etranze



OSI DAN SA NIMERO

13 Kestyon lekter

24 Akoz nou lavi i annan en vre bi

31 Dan nou arsviv

LARTIK LETID

■ Akonplir ou rol konman en predikater

Ki en predikater i fer? Sa lartik i reponn sa kekyon e montre akoz dimoun i bezwen antann sa bon nouvel. I osi eksplike ki manyer nou kapab reisi akonplir nou rol konman en predikater.

■ Eski ou “zele pour fer dibyen”?

Sa lartik i donn de fason ki manyer nou kapab atir dimoun ver Bondye ler nou “zele pour fer dibyen.” (Tit 2:14) Premyer-man par nou travay predikasyon e dezyenman, atraver nou bon kondwit.

■ Ranforsi ou maryaz par annan en bon kominikasyon

■ Paran ek zanfan, kominik avek lanmour

Pour annan en maryaz e en lavi fanmir ere i enportan ki en koup i annan en bon kominikasyon. Sa premye lartik i fer nou vwar de kalite ki kapab ed nou pour byen kominike. Sa dezyenm lartik i montre sa ki nou kapab fer pour sirmont bann baryer ki anpes annan en bon kominikasyon ant paran ek zanfan.

■ Protez ou leritaz par fer bann bon desizyon

Ki leritaz spirityel bann Kreyten i annan? Ki nou kapab aprann lo nou leritaz atraver legzanp Ezai? Ki pa nou bezwen pran ki pou ed nou fer sa bon swa konsernan nou leritaz? Sa lartik i reponn sa bann kekyon.



AKONPLIR OU ROL KONMAN EN PREDIKATER

*“Fer ou travay konman
predikater levanzil, e
ranpli ou devwar dan
servis Bondye.”*

—2 TIM. 4:5.

KI OU POU REPONN?

Ki en predikater i fer?

Akoz dimoun i bezwen antann
sa bon nouvel?

Ki bann predikater ki efikas
i fer?

EN PREDIKATER oubyen evanzelizater i en dimoun ki anons bon nouvel. Zeova i sa premye Evanzelizater e sa enn pli enportan. Zis apre ki nou premye paran ti rebele, Zeova ti anons en bon nouvel konmkwa sa serpan, andotmo, Satan oubyen Dyab pou ganny detrir. (Zen. 3:15) Diran plizyer syek ki'n pase, Zeova in enspir bann zonn fidel pour ekrire bann detay konsernan lafason ki bann repros ki'n ganny anmennen lo son non pou ganny retire, lafason ki bann domaz ki Satan in koze pou ganny repare e lafason ki imen i kapab reganny sa sans ki Adan ek Ev in perdi.

² Bann lanz osi i bann evanzelizater. Zot anons bon nouvel e ed lezot pour propaz sa bon nouvel. (Lik 1:19; 2:10; Akt 8:26, 27, 35; Rev. 14:6) Kwa ki kapab ganny dir konsernan Misel arkanz? Ler i ti lo later konman Zezi, i ti kit legzanp pour bann predikater imen. Anfet, Zezi ti viv pour anons sa bon nouvel. —Lik 4:16-21.

³ Zezi ti donn lord son bann disip pour vin bann predikater. (Mat. 28:19, 20; Akt 1:8) Pol ti ankouraz Timote an dizan: “Fer ou travay konman predikater levanzil, e ranpli ou devwar dan servis Bondye.” (2 Tim. 4:5) Konman disip Zezi, ki bon nouvel nou anonse partou? Sa bon nouvel i enplik sa laverite ankourazan ki Zeova, nou Papa ki dan lesyel i kontan nou. (Zan 3:16; 1 Pyer 5:7) En fason enportan ki Zeova i demontre son lanmour pour nou i a travers son Rwayonm. Alor, nou kontan pour dir lezot

-
1. Akoz Zeova i kapab ganny apele sa premye Evanzelizater e sa enn pli enportan?
 2. (a) Ki rol bann lanz i zwe an rapor avek predikasyon? (b) Ki legzanp Zezi in kite pour bann predikater?
 3. (a) Ki bon nouvel nou proklanm partou? (b) Ki keston ki enteres nou konman bann predikater?

ki tou sa ki soumet anba sa Rwayonm, obeir Bondye e fer sa ki drwat i kapab vin son zanmi. (Ps. 15:1, 2) Anfet, i dan plan Zeova pour elimin tou soufrans. I pou osi retir douler ki bann leksperyans lepase i anmennen. Pa sa i en bon nouvel! (Iza. 65:17) Vi ki nou bann evanzelizater, an-nou egzamin larepons sa de kestyon en-ortan: Akoz i enportan pour bann dimoun antann sa bon nouvel ozordi? Dan ki fason nou kapab reisi akonplir nou rol konman bann predikater?

AKOZ DIMOUN I BEZWEN ANTANN SA BON NOUVEL?

⁴ Zis fer krwar ou ganny dir ki ou papa in abandonn ou, ensi ki ou fanmir antye. Meton dimoun ki dir zot ti konn li, i dir ki i pa ti abordab, i ti rezerve e kriyel. Serten i menm kapab fer ou krwar ki i pa vo lapenn rod kontak ankor avek li akoz i'n mor. Anfet, bokou dimoun i ganny dir preski menm zafer konsernan Bondye. Zot ganny ansennyen ki Bondye i en mister, personn pa kapab konn li ouswa i kriyel. Par egzanp, serten sef relizye i dir ki Bondye pou met bann move dimoun dan en landrwa kot zot pou ganny pini e tourmante pour touzour. Lezot i dir ki Bondye i responsab pour bann soufrans ki dezans natirel i anmennen. Menm si sa bann levennman i touy bon dimoun ensi ki sa ki move, zot ganny dir ki tou sa la i en pinisyon sorti kot Bondye.

⁵ Lezot i dir ki Bondye pa egziste. An-liny avek sa, reflexir lo teori evolisyon. Bann ki siport sa teori i dir ki lavi in vin an egzistans par azar. Zot dir ki napa en Kreater. Serten in menm dir ki bann imen i zis en zannimo, e se pour sa rezon ki i pa drol ki serten i azir konman zanni-

4. Ki fo zistwar dimoun i rakonte parler konsernan Bondye?

5, 6. Ki lefe sa teori lo evolisyon ek bann fo lansennyman in annan lo bann dimoun?

mo. Zot ensiste ki i normal pour bann ki pli for fer soufer bann ki feb. Alor, i pa drol ki bokou i krwar ki i pou touzour annan lenzistis parmi nou. An tou ka, bann ki met konfyans dan evolisyon napa okenn lespwar.

⁶ Me, san okenn dout, sa teori lo evolisyon e bann fo krwayans i osi responsab pour soufrans ki limanite pe eksperyanse pandan sa bann dernyen zour. (Rom. 1:28-31; 2 Tim. 3:1-5) Sa bann lansennyman imen pa'n donn okenn vre bon nouvel eternel. Plito, parey zapot Pol i fer vwar, "zot lespri i dan fernwanr. Zot napa okenn par dan sa nouvo lavi ki Bondye i donneren." (Efe. 4:17-19) An plis ki sa, sa teori lo evolisyon ek bann fo lansennyman i anpes dimoun aksepte sa bon nouvel ki sorti kot Bondye.—*Lir Efezyen 2:11-13*.

⁷ Pour arive rekonsilye avek Bondye, bann dimoun i devret premyerman konvenki ki Zeova i egziste e ki i annan bon rezon pour apros avek li. Nou kapab ed zot ganny sa konnesans par ankouraz zot pour etidye kreasyon. Kan zot etidye kreasyon avek en lespri ouver, zot aprann lasazes Bondye ek son pwisans. (Rom. 1:19, 20) Dan nou zefor pour ed bann dimoun devlop en ladmirasyon kan zot reflexir lo sa ki nou Gran Kreater in fer, nou kapab servi brosir *Was Life Created?* ek *The Origin of Life—Five Questions Worth Asking*. Kantmenm sa, sa bann ki zis etidye kreasyon pa pou trouv larepons serten kestyon enportan dan lavi parey: Akoz Bondye i les nou soufer? Ki plan Bondye pour later? Eski Bondye i enterese avek mwan endividyelman?

⁸ Sel fason pour dimoun konpran klerman bon nouvel konsernan Bondye

7, 8. Dan ki fason nou kapab ed dimoun pour pli byen konpran sa bon nouvel?

Pour arive tous leker, persyad bann ki ekoute

ek son plan i atraver en letid Labib. Nou annan en gran privelez pour ed lezot trouv larepons zot kestyon, pa i vre! Me, pour arive tous leker bann ki ekoute, nou bezwen fer plis ki koz avek zot lo bann fe, nou devret persyad zot. (2 Tim. 3:14) Si nou swiv legzanp Zezi, nou pou kapab pli byen persyad lezot. Akoz i ti byen reisi dan sa domenn? En rezon i akoz i ti byen servi kestyon. Ki mannyer nou kapab imit li?

BANN PREDIKATER KI EFIKAS I SERVI BYEN KESTYON

⁹ Parey Zezi, akoz nou devret servi kestyon dan predikasyon? Egzamin sa senaryo: Ou dokter i dir ou ki i annan en bon nouvel pour ou. Ou kapab geri si ou fer en gro loperasyon. Petet ou pou krwar li. Me, si i dir ou sa san ki i menm demann ou ki ou gannyen? Sirman ou pa ti pou annan konfyans dan li. Menm si i en bon dokter, i bezwen demann ou kestyon e ekout ou ler ou eksplik li ou bann sentonm avan ki i kapab ed ou. Pareyman, si nou anvi ed bann dimoun pour aksepte sa bon nouvel lo Rwayonm Bondye, nou devret konnen konman pour servi kestyon dan en fason efikas. Nou pou pli kapab ed zot apre ki nou konpran byen zot leta spirityel.

¹⁰ Zezi ti konnen ki si nou swazir byen kestyon, sa pa zis ede pour sa an-

9. Ki nou devret fer si nou anvi ed dimoun spirityelman?

10, 11. Ki nou kapab akonplir si nou imit lafason ki Zezi ti ansennyen?

senyan konn son zelev, me osi pour ed li partisipe. Par egzanp, kan Zezi ti oule ansenny son bann disip en leson lo limilite, i ti premyerman demann en kestyon ki fer reflexir. (Mark 9:33) Pour ansenny Pyer konman pour rezonn lo bann prensip, Zezi ti demann li en kestyon kot i ti pou bezwen swazir larepons korek. (Mat. 17:24-26) Dan en lot moman, kan Zezi ti anvi konn sa ki ti dan leker son disip, i ti demann zot en seri kestyon pour konn zot pwennvi. (**Lir Matye 16: 13-17.**) An servan kestyon e atraver sa ki i ti dir, Zezi pa ti zis ed zot konpran bann fe. I ti tous zot leker, e motiv sa bann dimoun pour azir an armoni avek sa bon nouvel.

¹¹ Nou kapab aprann omwen trwa keksoz kan nou imit Zezi par servi kestyon dan en fason efikas. Nou konpran konman pour ed bann dimoun pli byen, konman pour sirmont lobzeksyon e ansenny bann ki annan limilite byenfe ki zot menm zot kapab gannyen. Reflexir lo sa trwa sityasyon ki pou montre nou konman pour byen servi kestyon.

¹² *Premye sityasyon:* Konman paran, ki ou ti pou fer si ou zanfan adolesan i dir ou ki i pa konnen konman pour defann son krwayans lo kreasyon avek son kanmarad lekol? San okenn dout, ou pou anvi ed li annan konfyans ki i pou kapab anons sa bon nouvel. Alor, olye kritik li ouswa konsey li deswit, akoz ou pa imit Zezi e demann li kestyon pour ou konn son pwennvi? Konman ou kapab fer sa?

¹³ Apre ki ou'n lir avek li en bout dan sa brosir *The Origin of Life—Five Questions Worth Asking*, ou kapab demann li ki pwen ladan ki fer reflexir plis. Ankouraz li pour esey vwar kwa ki'n persyad

12-14. Ki mannyer ou kapab ed ou zanfan pour pli konfidan kan i pe proklanm sa bon nouvel? Donn en legzanp.



1 | ed lezot pour konnen akoz zot annan en serten krwayans



2 | ouver zot lespri ek leker pour zot kapab aksepte laverite



3 | ed zot rezonnen pour tonm lo sa bon konklizyon

li pour krwar dan en Kreater e akoz i anvri fer lavolonte Bondye. (Rom. 12:2) Ed ou zanfan konpran ki son rezon pa neserman bezwen parey avek sa ki pour ou.

¹⁴ Eksplik li ki i kapab fer parey zot in fer ler i pe koz avek son kanmarad lekol. Setadir, i kapab repas lo serten fe avek sa zelev e apre demann li bann kestyon pour konn son pwennvi. Par egzanzp, i kapab demann son kanmarad lekol pour lir sa bwat lo paz 21 dan brosir *Origin of Life*. Apre sa, ou zanfan i kapab demande, 'Eski i vre ki DNA i annan sa kapasite pour stok plis lenformasyon ki okenn konpiter ki egziste dan sa lemond teknoloji?' Sirman sa kanmarad lekol pou dir wi. Apre, ou zanfan i kapab dir, 'Si bann enzenyer konpiter ki annan lespri pa kapab atenn sa bi, ki mannyer en keksoz ki napa lespri i kapab fer sa lo li menm?' Pour ed ou zanfan santi li pli konfidan pour koz avek lezot lo son lafwa, ou kapab fer bann demonstrasyon avek li tanzantan. Si ou montre li konman pour servi kestyon dan en fason efikas, ou pou ed li akonplir son rol konman en predikater.

¹⁵ *Dezyennm sityasyon*: Dan predikasyon, sirman nou zwenn dimoun ki dir Bondye pa egziste. Par egzanzp, en dimoun i kapab dir nou ki i pa krwar dan Bondye. Olye aret konversasyon lanmenm, avek respe nou kapab demann li konbyen letan i fer depi ki i santi koumsa e kwa ki'n fer li annan sa kalite pwennvi. Apre ki ou'n ekout son larepons e felisit li pour son refleksyon lo sa size, ou kapab demann li si i pou mal pour en dimoun lir en lenformasyon ki montre ki imen in ganny kree. Si sa met lakour i annan en lespri ouver, i pou sirman dir

15. Konman nou kapab servi kestyon pour ed en dimoun ki pa krwar dan Bondye?

ki i mal pour pa egzamin bann levidans parey. Apre sa, nou kapab ofer swa brosir *Was Life Created?* oubyen *The Origin of Life—Five Questions Worth Asking*. Kestyon ki ganny demande avek respe ek bon zizman i kapab parey en lakle ki ou-ver leker sa dimoun pour ki i aksepte sa bon nouvel.

¹⁶ *Trwazyennm sityasyon*: Kan pe kon-dwir en letid Labib, petet nou senpleman kapab les sa etidyan reponn dapre larepons ki dan sa piblikasyon ki nou pe etidye avek li. Me, si nou fer sa, nou kapab anpes sa etidyan progresse. Akoz? Parski en etidyan ki reponn san medit lo son larepons pa pou annan bann rasi ki profon spirityelman. I kapab fasilman vin parey en plant ki sek desito ki i rankontre lopoziyon. (Mat. 13:20, 21) Pour evit en tel rezilta, nou bezwen demann nou etidyan ki mannyer i santi an-ver sa ki i pe aprann. Esey vwar si i dakor avek pwen ki pe ganny fer resorti. Pli enportan ankor, demann li akoz i dakor ouswa pa dakor. Apre sa, ed li pour rezonn lo bann verse Labib pour ki a lafen di zour i kapab tonm lo sa bon konklizyon li menm. (Ebr. 5:14) Si nou servi byen kestyon, bann dimoun ki nou ansennyen pou vin pli for dan laverite e zot pou kapab reziste sa bann ki fer tou pour opoz zot ouswa anbet zot. (Kol. 2:6-8) Ki lezot keksoz nou kapab fer pour akonplir nou rol konman en predikater?

BANN PREDIKATER KI EFIKAS I ED KANMARAD

¹⁷ Zezi ti anvoy son bann disip prese de par de. (Mark 6:7; Lik 10:1) Pli

¹⁶. Akoz nou pa devret satisfè zis avek larepons ki nou etidyan i lir dan sa piblikasyon ki i pe etidye?

^{17, 18}. Kan nou akonpany en dimoun dan predikasyon, ki mannyer nou kapab travay konman en lekip?

tar, zapot Pol ti koz lo bann “kanmarad travay” ki ti’n “konbat akote [li] pour fer konn levanzil.” (Fili. 4:3) An armoni avek sa model, an 1953, bann proklanmater Rwayonm ti konmans swiv en program formasyon pour ed lezot dan predikasyon.

¹⁸ Kan ou akonpany en lot Kreyen dan predikasyon, ki mannyer zot kapab travay konman en lekip? (*Lir 1 Korentyen 3:6-9*.) Dan ou Labib, rod bann verse ki ou konpanyon pe servi. Get ou konpanyon ek sa met lakour ler zot pe koze. Swiv sa konversasyon atantivman zis anka i nesese pour ou ed ou konpanyon sirmont en lobzeksyon. (Ekle. 4:12) Me, atansyon! Fer zefor pour reziste sa tandans pour enteronp ou konpanyon kan i pe servi diferan pwen pour ed sa met lakour rezonnen. Si non, ou riske dekouraz ou konpanyon e konfiz sa met lakour. Par ler, i kapab apropiye pour partisip dan sa konversasyon. Me si ou anv dir en keksoz, fer zis enn oubyen de pti komanter. Apre, les ou konpanyon kontinyen koze.

¹⁹ Ki mannyer ou ek ou konpanyon i kapab ed kanmarad anmezir zot al kot en lot lakaz? Akoz ou pa profit sa letan pour koz lo fason ki ou kapab amelyor ou prezantasyon? Fer atansyon ki ou komanter lo bann dimoun dan sa teritwar pa dekourazan. Pareyman, pa bezwen koz an mal lo lezot proklanmater. (Prov. 18:24) I byen pour rapel ki nou tou nou bann vaz later. Zeova in demontre en gran labonte anver nou par donn nou sa responsabilite pour anons sa bon nouvel ki parey en trezor. (*Lir 2 Korentyen 4:1, 7*.) Alor, annou demontre lapresyasyon pour sa trezor par fer tou nou posib pour akonplir nou rol konman bann predikater.

¹⁹. Ki nou devret rapel e akoz?



ESKI OU “ZELE POUR FER DIBYEN”?

BOKOU dimoun i konsider li konman en loner pour ganny en pri akoz zot lareisit. Par egzanp, serten in ganny Pri Nobel akoz zot ti fer tou pour etabli lape ant bann nasyon ouswa parti politik ki pe lager antre zot. Me, ki pli gran loner i annan ankor ki ganny anvoye par Bondye konman bann anbasader ouswa reprezentan pour ed bann dimoun annan en relasyon anpe avek zot Kreater!

² Konman Temwen Zeova, nou annan sa loner spesyal. Anba konmann Bondye ek Kris, nou siplyi bann dimoun pour “les zot ganny rekonsilye avek Bondye.” (2 Kor. 5:20) Zeova pe servi nou pour atir dimoun ver li. Koumsa menm ki plizyer milyon dimoun dan plis ki 235 pei in arive ganny led pour annan en bon relasyon avek Bondye e annan sa lespwar pour ganny lavi eternel. (Tit 2:11) Avek devouman senter, nou envit “sa ki anvi, [pour] pran delo lavi gratwitman.” (Rev. 22:17) Lefet ki nou kontan nou responsabilite e fer li plenman, nou sirman kapab ganny dekrir konman en pep ki “zele pour fer dibyen.” (Tit 2:14) Aprezan annou vwar ki mannyer nou devouman pour fer sa ki byen i kapab atir lezot ver Zeova. En fason i atraver predikasyon.

IMIT DEVOUMAN ZEOVA EK ZEZI

³ Pour dekrir sa ki dominasyon Garson Bondye pou akonplir, Izai 9:7 i dir: “Se avek devouman ki Zeova bann larme pou fer sa.” Sa parol i montre ki nou Papa ki dan lesyel i enterese avek delivrans bann imen. Legzanp devouman Zeova i montre klerman ki sa travay ki nou’n gannye avek li konman bann proklamater i devret ganny fer avek tou nou leker e avek

1, 2. Ki loner spesyal Temwen Zeova i annan e ki mannyer ou santi anver sa loner?

3. Ki lasirans nou gannye atraver ‘devouman Zeova’?

“Zezi-Kri, . . . i’n donn son prop lavi pour nou, pour . . . pirifye nou konman en pep ki appartenir a li, en pep zele pour fer dibyen.”

—TIT 2:13, 14.

KI OU POU DIR?

Akoz ou konsider li en loner pour zele pour fer dibyen?

Ki mannyer Danyel 2:41-45 i ed nou konpran lenportans pour devoue dan minister?

Eksplike ki mannyer kondwit Kreyen i atir lezot ver vre ladorasyon ek Zeova.

devouman. Sa gran dezir ki nou annan pour ed lezot konn Bondye i en fason pour reflekte devouman Zeova. Alor, konman bann ki travay ansanm avek Bondye, eski nou determinen personnelman dapre nou sirkonstans pour partisip plenman dan sa travay pour proklanm sa bon nouvel? —1 Kor. 3:9.

⁴ Egzamin osi devouman Zezi. I'n kit en legzanp parfe an rapor avek perseverans ek devouman dan minister. Malgre bann gran lopoziyon, i ti gard son devouman dan predikasyon ziska lafen son lavi lo later. (Zan 18:36, 37) Determinasyon Zezi pour ed lezot konn Zeova ti vin pli for anmezir letan ti pe aprozé pour li ofer son lekor konman en sakrifis.

⁵ Par egzanzp, pandan lotonn lannen 32 N.L., Zezi ti donn legzanp konsernan en zonn ki ti annan en pye fig dan son plantasyon rezen ki pa ti raport okenn fri pour trwa-z-an. Apre ki i ti'n ganny demande pour koup sa pye fig, son zardinyen ti demann li en pe letan pour met fimyen avek sa pye. (*Lir Lik 13:6-9*.) Sa letan, zis en ptigin disip ki ti kapab ganny konte konman bann fri predikasyon Zezi. Me parey i ganny endike dan sa legzanp lo sa zardinyen, Zezi ti servi sa apepre sis mwan ki ti reste li pour entansifye son minister Zide ek Pere. Detrwa zour avan son lanmor, Zezi ti pler pour son bann konpatriyot ki ti "bous zot zorey."—Mat. 13:15; Lik 19:41.

⁶ Vi ki nou pe viv dan sa letan ki pli pros avek lafen, eski pa i enportan pour nou fer plis zefor dan predikasyon? (*Lir Danyel*

4. Dan ki fason Zezi in kit en legzanp perseverans ek devouman dan predikasyon?
5. Ki mannyer Zezi ti azir an armoni avek son legzanp konsernan pye fig?
6. Akoz nou devret fer plis dan predikasyon?

2:41-45.*) Pa i en gran privelez ki nou Temwen Zeova! Nou sa sel group dimoun dan lemonn ki pe donn lespwar limanite konsernan solisyon zot problemn. Dan en zournal, en zournalis ti dir ki *napa larepons* pour sa kestyon, "Akoz move keksoz i ariv avek bann bon dimoun?" I nou devwar ek privelez konman Kreyen pour donn dimoun ki pare pour ekoute larepons Labib pour bann kestyon parey. Nou annan tou rezon pour les nou ganny "pouse par lespri" anmezir nou akonplir nou travay ki Bondye in donn nou. (Rom. 12:11) Avek benediksyon Bondye, ler nou pres avek devouman, nou kapab ed lezot pour konn e kontan Zeova.

EN LETA LESPRI SAKRIFIS I ONOR ZEOVA

⁷ Parey legzanp zapot Pol i montre, dan nou minister nou kapab "mank sonmey, e mank manze." (2 Kor. 6:5) Sa de lekspreyion i donn nou en lide ki savedir viv en lavi sakrifis e i fer nou mazin bann pionye ki predikasyon i premye plas dan zot lavi e ki an menm tan zot bezwen siport zot lekor finansyerman. Mazin osi bann misyonner devoue ki donn zot lekor konman en sakrifis

* **Danyel 2:41-45:** ⁴¹ Parey ou ti vwar ki lipye ek ledwa lipye ti en parti an larzil ki en potye i servi e en parti an fer, sa rwayonn li menm pou divize, me i pou annan kantmenm en pe lafors fer ladan akoz parey ou'n vwar i ti annan fer melanze avek larzil mouye. ⁴² Kant a bann ledwa lipye ki ti en parti an fer e en parti an larzil mouye, sa rwayonn pou en parti for e en parti frazil. ⁴³ Parey ou ti vwar ki fer ti melanze avek larzil mouye, zot pou melanze avek bann desandans imen me zot pa pou atase avek kanmarad, sa enn avek sa lot, zis parey fer pa pe melanze avek larzil. ⁴⁴ Dan bann zour sa bann lerwa, Bondye lesyel pou etabli en rwayonn ki pa pou zanmen ganny detrir. Sa rwayonn li menm pa pou pas avek okenn lezot pep. I pou kraz e met en lafen avek tou sa bann rwayonn e li menm i pou dire pour en letan endefini. ⁴⁵ Lefet ki ou ti vwar en ros detase avek sa montanny non pa par lanmen zonn e i ti kraz sa fer, kwiv, larzil, larzan ek lor. Bondye li menm in fer konnen lerwa sa ki pou arive apre sa. Sa rev i vre e son enterpretasyon i dinyi konfyans."

7, 8. Ki mannyer en leta lespri sakrifis i onor Zeova?



Ou prezans dan predikasyon i ase pour donn en bon temwannayaz

pour servi dan bann pei etranze. (Fili. 2:17, NW) Ki nou pou dir konsernan nou bann ansyen ki travay dir e ki pa manze ouswa mank sonmey pour pran swen avek troupou Zeova? I osi annan bann aze ek sa bann ki lasante pa tro bon ki fer zot mye pour asiste renyon e partisip dan predikasyon. Nou leker i ranpli avek lapresyasyon kan nou mazin tou bann serviter Zeova ki annan en leta lespri sakrifis. Bann zefor koumsa i annan lefe lo lafason ki lezot i vwar nou minister.

⁸ Dan en let pour Lincolnshire *Boston Target*, Langleter, en leker ki pa Temwen ti dir: "Dimoun pe perdi konfyans dan larelizyon . . . Ki sa bann pret legliz i fer lazournen antye? I pa konmsi zot sorti kot zot parey Zezi e al zwenn dimoun . . . Sel larelizyon ki paret enterese se Temwen Zeova, zot sorti se zot e al zwenn dimoun e zot senserman pres laverite." Dan sa lemond kot dimoun i enterese zis avek zot prop lekor, nou leta lespri sakrifis i ede onor Zeova nou Bondye. —Rom. 12:1.

⁹ Me, ki nou kapab fer si nou paret pe perdi nou devouman pour nou minister? I pou byen si nou reflexir lo sa ki Zeova pe akonplir atraver predikasyon. (***Lir Romen 10:13-15.***) Pour en dimoun ganny delivre fodre i pe kriy o non Zeova avek lafwa, me dimoun pa pou kapab fer sa si nou pa pres avek zot. Ler nou konpran sa, sa pou motiv nou pour reste zele pour fer dibyen e pour proklanm sa bon nouvel lo Rwayonm plennman.

BON KONDWIT I ATIR DIMOUN VER BONDYE

¹⁰ Menm si devouman i enportan dan minister, zis devouman tousel pa ase pour atir lezot ver Bondye. Dezyenm laspe enportan pour pres avek devouman pour atir dimoun ver Bondye se nou kondwit konman Kreyten. Pol ti met lanfaz lo lenportans nou

⁹ Kwa ki kapab motiv nou pour reste zele pour fer dibyen dan predikasyon?

¹⁰ Akoz i kapab ganny dir ki nou bon kondwit i atir dimoun ver Zeova?

kondwit kan i ti ekrir: “Nou pa oule plas okenn lobstak devan personn, pour ki nou servis pour Bondye pa ganny blanmen.” (2 Kor. 6:3) Nou parol ankourazan e bon kondwit i kapab fer lansennyman Labib pli atiran, i atir lezot ver ladorasyon Zeova. (Tit 2:10) Anfet, souvan nou antann bann bon rezilta kot bann dimoun senser in obzerv nou kondwit Kreyen.

¹¹ Menm si nou rekonnet ki nou aksyon i kapab annan en bon lefe lo lezot, lekotrer osi i posib. Alor, ki swa nou kot travay, kot lakour ouswa kot lekol, nou pa oule ki personn i trouv okenn defo avek nou minister ek nou kondwit. Si nou fer pese volonterman, son konsekans i kapab fatal. (Ebr. 10: 26, 27) Atraver lapriyer, egzamin sa ki nou pe fer e lefe ki nou fason viv i annan lo lezot. Anmezir standar moral sa lemonn i kontinyen deteryore, bann dimoun senser pou sirman “vwar ladiferans . . . ant enn ki pe servi Bondye ek enn ki pa’n servi li.” (Mal. 3:18) Wi, nou bon kondwit i zve en rol enportan pour rekonsilye bann dimoun avek Bondye.

¹² Ler i ti ekrir bann Korentyen, Pol ti montre zot ki i ti’n eksperyans soufrans, difikilte, ganny bate e met dan prizon. (*Lir 2 Korentyen 6:4, 5*) Kan nou eksperyans bann leprev ki teste nou lafwa, nou landirans i kapab ed lezot aksepte laverite. Pour donn en legzanp: En pe letan pase, i ti annan en zefor ki ti pe ganny fer pour elimmin Temwen Zeova dan en rezyon Angola. De Temwen ek 30 dimoun ki ti enterese e ki ti pe asiste renyon ti ganny rasanble ansanm. Bann zabitan sa landrwa ti ganny rasanble pour gete anmezir bann opozan ti bat sa bann inosan ziska zot ti sennyen. Menm

11. Akoz atraver lapriyer nou devret egzamin lefe nou kondwit?

12-14. Ki mannyer lafason ki nou fer fas avek leprev i annan lefe lo lafason ki lezot i vwar nou minister? Donn legzanp.

bann madanm ek zanfan osi ti sibir sa kriyote. Sa bann dimoun ti fer sa pour ki personn pa ekout Temwen Zeova. Me zis mazin sa, apre sa bate an piblik, en kantite dimoun dan sa kominote ti apros bann Temwen e demann zot en letid Labib! Depi sa, sa bon nouvel in kontinyen propaze, i annan en kantite ogmantasyon ek bokou benediksyon.

¹³ Sa legzanp i montre lefe ki nou pozisyon ferm pour defann bann prensip Labib i kapab annan lo lezot. Petet nou kapab pe mazin konbyen dimoun ki ti rekonsilye avek Bondye akoz kouraz zapot Pyer ek lezot zapot. (Akt 5:17-29) Dan nou ka, nou bann kanmarad lekol, koleg travay ouswa nou manm fanmir i kapab aksepte laverite kan zot vwar sa pozisyon ferm ki nou pran pour sa ki drwat.

¹⁴ La konmela, serten nou bann frer pe eksperyans persekisyon. Par egzanzp, Larmeni, apepre 40 frer i dan prizon akoz zot pa pran okenn kote politik, e plizyer douzenn lezot i riske ganny anprizonnen dan bann mwan ki pe vini. Leritre, 55 serviter Zeova i dan prizon, serten i plis ki 60 an. Sid Kore, apepre 700 Temwen i dan prizon akoz zot lafwa. I fer pros 60 an depi ki sityasyon i koumsa laba. Annou priye ki fidelite sa bann frer ki pe ganny persekute dan plizyer pei i rann glwar Bondye e ed sa bann ki kontan ladrwatir pour pran pozisyon pour vre ladorasyon.—Ps. 76:8-10.

¹⁵ Lefet ki nou viv en lavi onnet osi i kapab atir dimoun ver laverite. (*Lir 2 Korentyen 6:4, 7*) Par egzanzp, get sa leksperyans: En ser ti pe met larzan dan en masin ki donn tiket bis kan en dimoun ki i ti konnen ti dir li ki i pa vo lapenn pey sa tiket akoz i pa ti pe al tro lwen. Sa ser ti eksplike ki i ti byen pour li pey tiket, menm si i ti pe zis al aret prosen bèstop. Apre sa, son

15. Donn legzanp pour montre ki mannyer lonnekte i kapab atir dimoun ver laverite.



Lezot i remark ou lonnekte ek travay dir

zanmi ti debarke. Ler i ti vwar sa, sa drayver ti vire e demann li, “Ou en Temwen Zeova ou?” Sa ser ti dir, “Wi, me akoz ou demann sa?” Drayver ti dir: “Mon’n tann ou konvèrsasyon konsernan pey tiket e mon konnen ki Temwen Zeova i parmi sa ptigin dimoun ki fer sa e ki onnet dan tou keksoz.” Detrwa mwan pli tar, en zonn ti apros sa ser kot lasal e dir, “Ou rapel mwan? Mwan menm sa drayver bis ki ti koz avek ou konsernan pey tiket. Apre ki mon ti’n obzerv ou kondwit, mon ti deside konmans etidye Labib avek Temwen Zeova.” Nou repitasyon konman bann dimoun onnet i onor nou konman bann evanzelizater ki diny konfyans.

TOUZOUR DEMONTRE BANN KALITE KI ONOR BONDYE

¹⁶ Nou osi zve en rol pour atir dimoun ver Zeova kan nou demontre bann kalite parey pasyans, lanmour ek labonte. Serten ki’n obzerv nou i kapab annan sa dezir pour aprann konn Zeova, son plan ek son pep. Latitid ek kondwit bann vre Kreyen i diferan avek sa bann ki pretann zot servi Bondye an deor,

16. Akoz bann kalite parey pasyans, lanmour ek labonte i tous leker lezot? Donn legzanp.

me anndan, zot pe zis azir konman bann ipokrit. Serten sef relizye in vin ris akoz zot in anbet, servi larzan bann parwasyon pour aste bann lakaz ser ek loto e dan en ka, i ti menm annan enn ki ti aste en lakaz lisyen ki ti annan erkonn ladan. Sirman, bokou ki pretann ki zot disip Kris napa okenn lanvi pour ‘donn pour nanryen.’ (Mat. 10:8) Plito, parey bann pret egois dan letan lontan Izrael, zot “ansennyen zis pour en pri” e lamazorite sa ki zot ansennyen pa baze lo Labib. (Mik. 3:11) Sa bann aksyon ipokrit i pa rekonsilye personn avek Bondye.

¹⁷ De lot kote, bann vre lansennyman Kreyen ek bann bon aksyon anver nou prosen i tous leker. Par egzanp, en fwa ler i ti pe pres portanport, en frer pionye ti ganny pouse par en vev aze. I ti dir ki ler sa frer ti’n pez son sonnet, i ti lo en lesel dan lakwizin pe esey ranplas en glob. Sa frer ti dir: “I danzere pour ou fer sa ou tousel.” Sa pionye ti apre sa sanz sa glob e kontiny son semen. Kan garson sa madanm ti tann sa ki ti’n arive, i ti sitan enpresyonnen ki i ti al rod sa frer pour demontre son lapresyasyon. Avek letan, sa garson ti aksepte en letid Labib.

¹⁸ Akoz ou determinen pour kontinyen fer dibyen? Petet akoz ou konnen ki ler nou devoue dan nou minister e viv an armoni avek lavolonte Bondye, nou onor Zeova e sa i kapab ed lezot pour ganny delivre. (**Lir 1 Korentyen 10:31-33.**) Lanmour pour Bondye e pour nou prosen ki pous nou pour annan devouman pour fer sa ki byen, pour pres sa bon nouvel e konport nou konman bann vre Kreyen. (Mat. 22:37-39) Si nou zele pour fer dibyen, nou pou ganny bokou lazwa ek satisfaksyon depi la konmela. Deplis, nou kapab esper avek enpasyans sa zour kan tou limanite pou demontre devouman pour vre ladorasyon par onor Zeova, nou Kreater.

17, 18. (a) Dan ki fason Zeova i ganny onore par nou bon aksyon? (b) Kwa ki motiv ou pour zele pour fer dibyen?

Eski bann Izraelit ti egzekut bann kriminel anpandan lo potò?

■ Bokou nasyon dan letan pase ti egzekut bann kriminel par klout zot lo potò. Bann Romen ti anmare oubyen klout en kriminel lo potò, kot i ti pou kapab reste vivan pour plizyer zour ziska ki i mor avek douler, laswaf, lafen, lasaler ek lafreser. Pour bann Romen, i ti en laont pour sa kriminel ganny egzekite dan sa fason.

Ki nou kapab dir konsernan nasyon Izrael dan letan lontan? Eski bann Izraelit ti met a mor bann kriminel lo potò? Lalwa Moiz ti dir kwa ki ti devret ganny fer: “An ka i arive ki en zonm i fer en pese ki merit lanmor, e i’n ganny met a mor, e ou’n bezwen met li anpandan lo en potò, son lekor pa devret reste lo sa potò tou lannwit, me ou devret fer tou pour anter li sa menm zour.” (Det. 21:22, 23) Alor, letan ki Lekritir Ebre ti pe ganny ekrir, i evidan ki en dimoun ti ganny touye avan ganny met anpandan lo en potò oubyen pye dibwa.

Pour sa rezon, Levitik 20:2 i dir: “Nenport zonm parmi bann garson Izrael, e nenport rezidan etranze ki en etranze an Izrael, ki donn enn parmi son bann zanfan avek Molek, i devret sirman ganny met a mor. Bann dimoun sa pei i devret saboul li avek ros.” Bann ki ti annan lespri devinen osi ti bezwen ganny met a mor. Konman? ‘Par saboul zot avek ros.’—Lev. 20:27.

Deteronnm 22:23, 24 i dir: “An ka i arive ki en fiy vyerz ki’n fiyanse pour

marye avek en zonm, e en zonm i trouv li dan lavil e i dormi avek li, zot bezwen anmenn tou le de an deor baro sa lavil e saboul zot avek ros e zot bezwen mor, sa fiy pour rezon ki i pa ti kriy o sekour dan sa lavil, e sa zonm pour rezon ki i’n imilye madanm son konpanyon. Alor zot bezwen retir tou lemal parmi zot.” Alor, pour bann Izraelit sa lepok,

Letan ki Lekritir Ebre ti pe ganny ekrir, i evidan ki en dimoun ti ganny touye avan ganny met anpandan lo en potò oubyen pye dibwa

saboul avek ros ti sa metod prensipal pour met a mor en dimoun ki ti’n komet en krim ki merit lanmor.*

Deteronnm 21:23 i dir ki “en keksoz ki’n ganny modi par Bondye i sa enn ki’n ganny pann.” Les lekor en kriminel, andotmo, enn ki’n ganny “modi par Bondye” anpandan kot tou dimoun i vwar ti pou’n bezwen annan en lefe lo bann Izraelit. Anfet, met anpandan lekor en kriminel lo en potò oubyen lo en pye dibwa, ti servi konman en laverisman pour lezot.

* Bokou spesyalis Labib i dakor ki dapre Lalwa, en kriminel ti devret ganny egzekite *avan* ki son lekor i ganny met anpandan lo en potò. Me, i annan levidans ki ver premye syek bann zwif ti klout serten kriminel vivan e zot ti mor lo potò.



RANFORSI OU MARYAZ PAR ANNAN EN BON KOMINIKASYON

“En parol ki ganny dir dan son moman apropiye, i parey ponm lor dan bann skilptir annarzan.”—PROV. 25:11.

KI OU POU REPONN?

Dan ki fason demontre bon zizman i ede pour ki i annan en bon kominikasyon dan maryaz?

Akoz bann dimoun ki'n marye i bezwen demontre respe pour kanmarad?

Ler bann dimoun ki'n marye i devlop limilite, ki lefe sa i kapab annan dan maryaz?

EN FRER Kanada ti dir: “Mon ti pou pli kontan pas letan avek mon madanm ki okenn lezot dimoun. Mon lazwa i ogmante e mon soufrans i diminyen ler mon madanm i dan mon kote.” En msye Lostrali ti ekrir: “Pandan sa 11 an ki nou'n marye, i pa'n zanmen pas en sel zour ki mon pa'n koz avek mon madanm. Nou napa okenn dout oubyen lenkyetid ki nou maryaz pa solid. Nou abitye annan en bon kominikasyon e sa i en premye rezon ki fer nou maryaz solid.” En ser Costa Rica i dir: “Lefet ki nou annan en bon kominikasyon sa pa'n zis anrиси nou maryaz, me in osi ed nou vin pli pros avek Zeova, protez nou pour pa tonm dan tantasyon, ini nou konman en koup e fer nou lanmour pour kanmarad vin pli for.”

² Eski ou ek ou konzwen zot annan sa bon kominikasyon oubyen pour zot sa i en defi? I vre, bann sityasyon difisil i kapab leve dan maryaz, akoz maryaz i en linyon ant de dimoun enparfe ki annan diferan personnalite, e zot annan bann tre ki reflekte zot kiltir e fason ki zot in ganny elve. (Rom. 3:23) Deplis, en koup marye i kapab annan diferan fason kominike. I pa pour nanryen ki John Gottman ek Nan Silver, de dimoun ki fer resers lo maryaz i dir: “I demann kouraz ek determinasyon pour gard en relasyon maryaz ki dirab.”

³ I demann bokou zefor pour fer en maryaz reisi, me a lafen di zour sa i anmenn en kantite lazwa. Bann konzwen ki kontan kanmarad i vreman kapab trouv lazwa dan zot maryaz. (Ekle. 9:9) Annou vwar bon legzanp lavi maryaz Izaak ek Rebeka. (Zen. 24:67) Menm

1. Ki mannyer en bon kominikasyon i ede dan maryaz?
2. Ki fakter ki anpes annan en bon kominikasyon?
3. Kwa ki kapab ed bann koup marye ranforsi zot maryaz?

apre ki en serten letan ti'n pase depi ki zot ti'n marye, napa okenn par dan Labib ki donn nou lenpresyon ki zot ti nepli kontan kanmarad parey avan. Nou kapab dir menm keksoz konsernan bokou koup marye ozordi. Ki zot sekre? Zot in aprann pour eksprim zot panse ek santiman avek kanmarad dan en fason onnet, me dan en fason zantiy. Pour arive fer sa zot in bezwen develop e demontre bon zizman, lanmour, profon respe, e limilite. Nou pou vwar aprezan ki ler sa bann kalite i ganny demontre dan maryaz sa i fer li fasil pour annan en bon komunikasyon.

ANNAN BON ZIZMAN

⁴ Proverb 16:20 i dir: "Sa enn ki annan bon zizman dan en sityasyon pou vwar sa ki bon." Sa parol i vre an sa ki konsern maryaz ek lavi fanmir. (*Lir Proverb 24:3.**) Parol Bondye i sa meyer sours bon zizman ek lasazes. Zenez 2:18 i dir nou ki Bondye ti kre madanm pour ki i vin en led pour son msye me pa son fotokopi. Nou vwar byen son rol dan lafason ki i kominike. I vre ki sak dimoun i diferan, me normalman bann madanm i kontan eksprim zot santiman, zot konsernen avek relasyon ki dimoun i annan avek kanmarad. Zot apresye bann bon konversasyon amikal, akoz sa i reasir zot ki le-zot i kontan zot. De lot kote, bokou msye pa tro kontan koz lo zot santiman, zot pli kontan koz lo bann aktivite, problem ek solisyon, me bann msye i oule ganny respekte.

⁵ En ser Grannbretanny i dir: "Mon msye i oule rezourd problem deswit olye pran letan pour ekout mwan. Sa i kapab vreman fer mwan fristre, mon zis anvi 'en tas dite e ki i senpatiz avek mwan.'" En msye ti ekrir: "Kan mon madanm ek mwan ti'n fek mar-

* **Proverb 24:3:** "Par lasazes en fanmir i ganny batir e par disernman i pou ganny etabli solidman."

4, 5. Ki mannyer bon zizman i kapab ed en koup konpran kanmarad pli byen? Donn legzanp.

ye, mon ti annan sa tandans taye pour rod solisyon pour nenport problem ki i ti annan. Me, vitman mon ti konpran ki i ti zis vreman anvi ki mon ekout li." (Prov. 18:13; Zak 1:19) En msye ki annan bon zizman i pran an konsiderasyon santiman son madanm e i esey rod sa fason apropiye pour koz avek li. Ler i fer sa, i reasir son madanm ki son panse ek santiman i annan valer pour li. (1 Pyer 3:7) An retour, sa madanm i esey konpran pwennvi son msye. Kan msye ek madanm i konpran, apresye e desarz zot responsabilite dapre Labib, zot form en zoli koup. Deplis, zot kapab travay ansanm pour fer e aplik bann desizyon saz e ekilibre.

⁶ En koup ki annan bon zizman i osi konnen ki i annan "en letan pour reste trankil e en letan pour koze." (Ekle. 3:1, 7) En ser ki'n marye depi di-z-an i fer sa remark: "Aprezan mon'n realize ki parler i pa apropiye pour koz lo en topik. Si mon msye i annan en ta louvraz oubyen responsabilite, mon les en pe letan pase avan ki mon lev serten topik. Sa i fer nou annan bann konversasyon pli amikal." Bann madanm ki annan bon zizman i koz avek ladouser e konsyan ki bann parol byen swazir "ki ganny dir *dan son moman apropiye*" i atiran e ganny apresye.—*Lir Proverb 25:11.**

⁷ En msye Kreyen i devret fer son par, i pa devret zis ekout son madanm me i osi devret fer zefor pour eksprim son santiman klerman. En ansyen ki'n marye depi 27 an i dir: "I demann bokou zefor pour mwan arive eksprim sa ki dan fon mon leker avek mon madanm." En frer ki'n marye depi 24-r-an i fer sa remark: "Mon kapab gard

* **Proverb 25:11:** "En parol ki ganny dir dan son moman apropiye, i parey ponm lor dan bann skilptir annazan."

6, 7. (a) Dan ki fason sa prensip dan Eklezyast 3:7 i kapab ed en koup pour annan bon zizman? (b) Ki mannyer en madanm i demontre disernman e ki zefor en msye i devret fer?



Bann pti keksoz i fer en gran diferans dan maryaz

keksoz anndan, par mazinen, ‘Si mon pa koz lo mon problemn, sa problemn pou disparet.’ Me, mon’n realize ki i pa en febles pour eksprim mon santiman. Kan mon fer zefor pour eksprim sa ki mon santi, mon priye pour servi sa bon parol e sa bon fason pour dir zot. Apre mon pran en gran respirasyon e konmans koze.” Sa ki osi ede, se pour swazir sa bon moman, petet ler zot tousel pe egzamin teks pour lazournen oubyen pe lir Labib.

⁸ I enportan ki msye ek madanm i priye e annan sa dezir pour amelyor lafason ki zot kominike. Definitivman, i difisil pour sanz bann vye labitid. Me ler en koup i kontan Zeova, demann li son lespri sen, e konsider zot maryaz sakre, zot annan en motivasyon ki bokou dimoun napa. En madanm 26 an ti ekri: “Mon msye ek mwan nou pran pwennvi Zeova lo maryaz o serye, alor nou pa ni menm mazin separe avek kanmarad. Sa i fer nou fer plis zefor pour rezourd nou problemn e pran letan pour koz lo la ansanm.” Ler nou demontre sa kalite lwayote ek devosyon anver Bondye, nou fer li plezi e an retour i beni nou.—Ps. 127:1.

8. Ki lezot motivasyon bann koup Kreyen i annan pour fer zot maryaz reisi?

ANNAN PLIS LANMOUR

⁹ Lanmour i sa kalite pli enportan dan maryaz, i “soud tou keksoz parfetman ansanm dan larmoni.” (Kol. 3:14) Vre lanmour i ogmante anmezir ki sa koup i eksperyans lavi ansanm, dan botan e dan move-tan. Zot vin zanmi pli pros e kontan pas letan ansanm. Sa kalite maryaz pa ganny batir zis avek detrwa bon aksyon parey nou vwar dan medya, me par en kantite pti aksyon. Par egzanp, ler sa koup i may kanmarad, fer en remark zantiy, azir dan en fason ki montre ki zot in reflesir davans, fer en zoli sourir, oubyen demann senserman “ki mannyer ou lazournen in pase?,” sa i bann *pti* keksoz ki kapab fer en *gran* diferans dan maryaz. En msye ki’n marye pour 19 an i dir ki li ek son madanm zot kontan telefonn oubyen teks kanmarad pandan lazournen zis pour vwar ki mannyer keksoz pe ale.

¹⁰ Lanmour i motiv en koup pour kontinyen aprann konn kanmarad. (Fili. 2:4) Sa konnesans an retour i fer zot lanmour vin pli for malgre zot lenperfeksyon. En maryaz ki reisi i amelyore avek letan, e vin pli for, me i pa reste parey i ti ete o konmansman.

9, 10. Dan ki fason pratik en koup i kapab ranfor-si zot lanmour?

Si ou'n marye, demann ou lekor sa bann kestyon: 'Eski mon vreman konn mon konzwen? Eski mon konn son santiman ek son fason panse? Konbyen fwa mon mazin li, petet reflexir lo son bann kalite ki ti atir mwan anver li?'

DEVLOP RESPE

¹¹ I pa egziste en linyon parfe menm dan sa maryaz pli ere, e kantmenm sa koup i kontan kanmarad zot pa pou touzour annan menm pwennvi. Abraam ek Sara pa ti tonm dakor lo tou keksoz. (Zen. 21:9-11) Me malgre ki zot ti annan pwennvi diferan parler, sa pa ti kre en baryer ant zot. Akoz? Zot ti tret kanmarad avek dinyite ek respe. Par egzanzp, Abraam ti dir "silvouple" avek Sara. (Zen. 12:11, 13) Tandis ki Sara, i ti obeir Abraam e konsider li konman son "senyer" dan son leker. (Zen. 18:12) Souvan nou remarke ki en koup i mank respe pour kanmarad dan lafason ki zot koze e zot ton lavwa. (Prov. 12:18) Si zot pa travay lo sa problenm, zot maryaz pou an danze.—*Lir Zak 3:7-10, 17, 18.*

11. Akoz respe i en faktè enportan pour en maryaz reisi? Eksplike.

¹² Bann dimoun ki fek marye i devret sir-tou travay dir pour koz dan en fason zantiy e avek respe, sa pou kre en bon lanbyans pour ki i fasil pour zot kominike dan en fason onnet. En msye i rapel: "Kantmenm bann premye lannen maryaz i kapab gou, parler i kapab annan bann dezapwentman. Anmezir ki ou konmans abitye avek santiman, labitid, ek bezwen ou madanm e li avek sa ki pour ou, i kapab annan serten pti problenm ki leve ant zot de. Me si zot azir dan en fason rezonnab, pa pran tou keksoz o serye, demontre limilite, annan pasyans e depan lo Zeova, zot pou kapab tenir ferm." Sa i sirman vre!

DEMONTRE VRE LIMILITE

¹³ En bon kominikasyon dan maryaz i parey en pti sours delo ki pe koule dousman e trankilman dan en zarden. En dimoun ki "viv avek limilite" i zwe son rol pour ki sa delo i kontinyen koule. (1 Pyer 3:8) En frer ki'n marye pour 11 an i dir: "Limilite i sa mwayen pli fasil pour rezourd bann

12. Akoz i enportan pour bann dimoun ki fek marye travay dir pour aprann koz avek respe?

13. Akoz limilite i en faktè enportan dan maryaz?

Gard en bon kominikasyon dan maryaz



problenm, akoz i motiv ou pour dir: 'Eskiz mwan.'” En ansyen ki'n marye pour 20-t-an i fer sa remark: “Parler sa mo 'eskiz mwan' i pli enportan ki 'Mon kontan ou.'” I ti osi azoute: “En fason pli fasil pour demontre limilite i lapriyer. Ler nou de mon madanm nou priy Zeova, nou rapel ki nou enparfe e ki nou bezwen labonte ekstraordiner ki Bondye i demontre. Sa rapel saz i ed mwan vwar keksoz dan sa bon fason.”

¹⁴ Par kont, lorgey pa anmenn lape. I fer kominikasyon difisil e anpes en dimoun annan sa lanvi ek kouraz pour demann leskiz. O kontrer, olye annan limilite pour dir: “Eskiz mwan, silvouple pardonn mwan,” en dimoun orgeye i rod leskiz. Olye annan sa kouraz pour aksepte son febles, i konsantre lo defo sa lot dimoun. Kan en dimoun i bles li, olye rod lape, i ofanse, petet menm reponn dan en fason dir oubyen aret koz avek sa lot dimoun. (Ekle. 7:9) Wi, lorgey i kapab danzere pour en maryaz. I byen pour rapel ki “Bondye i opoz bann ki annan lorgey me i donn son lagras bann ki annan limilite.” —Zak 4:6.

¹⁵ Byensir, i bet pour mazine ki lorgey pa pou zanmen egziste dan maryaz. Nou devret rekonnet sa tandans e azir deswit. Pol ti dir avek son bann konpanyon Kreyten: “Pa les zot lakoler dire ziska aswar. Pa les dyab pran lavantaz lo zot.” (Efe. 4:26, 27) Si nou pa ekout Parol Bondye, nou kapab sibir soufrans pour nanryen. En ser ti fer sa komanter tris: “Souvandfwa mon msye ek mwan nou pa ti aplik sa konsey dan Efezyen 4:26, 27. Kan sa ti arive, mon ti pas bann pli move lannwit!” Pa i ti pou pli mye diskrit keksoz ansanm deswit avek bi pour rekonsilye! Byensir, sa de konzwen i bezwen donn kanmarad letan pour ki presyon

i diminyen. I pli apropiye osi pour priy Zeova pour ed ou annan sa bon leta lespri. Sa i enkli annan limilite, e koumsa ou pa pou konsantre lo ou me lo sa problenm, si non sa sityasyon pou vin pli pir.—*Lir Kolosyen 3: 12, 13.*

¹⁶ En dimoun ki modes e annan limilite pou konsantre lo pwen for son konzwen. Pour donn en legzanp: Meton en madanm i annan en talan spesyal ki i servi pour byen-net son fanmir. Si son msye i annan limilite e i modes, i pa pou santi konmsi son madanm pe fer konpetisyon avek li, me i pou ankouraz li pour servi son don, e sa pou montre ki son madanm i annan valer pour li e ki i apresye li. (Prov. 31:10, 28; Efe. 5: 28, 29) An menm tan, en madanm ki annan limilite e ki modes pa pou demonstre, ni abes son msye. Apre tou, zot tou le de zot “en sel laser” e sa ki bles enn i bles lot. —Mat. 19:4, 5.

¹⁷ San dout ou anvi ki ou maryaz i parey sa ki ti pour Abraam ek Sara oubyen Izaak ek Rebeka, en maryaz ki vreman ere e dirab e ki anmenn louanz pour Zeova. Alor, kontinyen annan menm pwennvi ki Bondye lo maryaz. Rod lasazes ek bon zizman dan son Parol. Devlop “laflanm Ya,” setadir sa vre lanmour par reflexir avek lapresyasyon lo ou konzwen. (Sal. 8:6) Fer bokou zefor pour devlop limilite. Tret ou konzwen avek respe. Si ou fer tousala, ou pou trouv lazwa dan ou maryaz e rezwir leker ou Papa ki dan lesyel. (Prov. 27:11) Definitivman, ou santiman pou parey sa msye ki'n marye pour 27 an ki ti ekrir: “Mon pa kapab mazin lavi san mon madanm. Nou maryaz pe kontinyen vin pli for sak zour. Sa i akoz nou lanmour pour Zeova e nou kominikasyon regilye avek kanmarad.”

¹⁴. Ki mannyer lorgey i kapab afekte en maryaz?

¹⁵. Eksplike ki mannyer aplik sa prensip dan Efezyen 4:26, 27 i kapab ed en koup marye fer fas avek bann problenm ki kapab leve ant zot.

¹⁶. Ki mannyer limilite i kapab ed en koup pour vwar pwen for kanmarad dan sa bon fason?

¹⁷. Kwa ki kapab fer en maryaz ere ozordi e anmenn louanz pour Bondye?



PARAN EK ZANFAN, KOMINIK AVEK LANMOUR

*“Tou dimoun i devre
pare pou ekoute, me
pran letan avan koze,
avan pran lakoler.”*

–ZAK 1:19.

KI OU POU REPONN?

Akoz i enportan pour servi byen
nou letan pour kominike?

Ki mannyer bann paran i kapab
aplik Zak 1:19?

Ki mannyer bann zanfan i kapab
aplik Zak 1:19?

“SI OU ti aprann ki ou paran pe al mor demen, ki ou ti pou pli anvi dir zot ozordi?” Sa keston ti ganny demande avek plizyer santenn zanfan Leta-z-ini. Olye konsantre lo problemn oubyen dezakor ki ti kapab pe fatig zot, sa liv ki annan pour tit *For Parents Only*, ki’n ganny ekrir par Shaunti Feldhahn ek Lisa Rice i fer resorti ki apepre 95 pousan ti dir ki zot ti pou dir zot paran: “Eskiz mwan” e “Mon kontan ou en kantite.”

² Normalman, zanfan i kontan zot paran e paran i kontan zot zanfan. Sa i sirtou le ka dan bann fanmir Kreyen. Kantmenm paran ek zanfan i vreman anvi vin pli pros avek kanmarad, parfwa zot vwar li difisil pour kominike. Akoz paran ek zanfan i evite koz lo serten topik menm si zot annan en bon kominikasyon e koz fran avek kanmarad? Ki serten baryer ki anpes annan en bon kominikasyon? Ki mannyer zot kapab sirmont sa difikilte?

“SERVI BYEN” LETAN POUR KOMINIKE

³ En kantite fanmir i vwar li difisil pour trouv sifizaman letan pour fer bann bon konversasyon. Sa pa’n touzour le ka. Moiz ti dir bann papa Izraelit: “Ou bezwen fer [parol Bondye] antre dan ou garson e koz lo la ler ou pe asize dan ou lakaz, ler ou pe marse lo semen, ler ou pe alonze e ler ou leve.” (Det. 6:6, 7) Zanfan ti pas letan swa avek zot manman kot lakour ouswa avek zot papa dan plantasyon oubyen son landrwa travay. Paran ek zanfan ti annan bokou letan pour pas ansanm e pour koze. I pour sa rezon ki i ti

1, 2. Ki santiman paran ek zanfan i normalman annan pour kanmarad, me ki serten difikilte zot souvan rankontre?

3. (a) Akoz bon kominikasyon i en defi pour en kantite fanmir? (b) Akoz i pa ti en problemn pour bann fanmir Izraelit pas letan ansanm?



Pa les distraksyon ek sa dezir pour izol ou lekou anpes ou annan sa bon kominikasyon dan fanmir

posib pour bann paran Izraelit konn bezwen, dezir ek personnalite zot zanfan. Pareyman, i ti annan ase letan ek loportinite pour bann zanfan konn zot paran byen.

⁴ Pa i vreman diferan ozordi! Dan serten pei, bann zanfan i konmans al lekou byen boner, parfwa zot annan zis deziran. I annan en kantite papa ek manman ki travay lwen avek zot lakou. Sa pti gin letan ki paran ek zanfan i ansanm, souvan konpiter, televizyon oubyen lezot keksoz elektronik i anpes zot kominike. Dan bokou ka, zanfan ek paran i viv sakkenn pour li, konmsi zot pa konn kanmarad. Apenn si zot fer en bon konversasyon.

⁵ Eski ou kapab “servi byen” sa letan ki ou pase pour fer lezot keksoz pour pas plis letan avek ou fanmir? (*Lir Efezyen 5:*

4. Akoz i difisil pour en fanmir ozordi annan en bon kominikasyon?

5, 6. Ki mannyer serten paran i “servi byen” sa letan ki zot annan pour pas plis letan avek zot zanfan?

15, 16.) Serten fanmir i dakor pour limit lakantite letan ki zot pase pour get televizyon oubyen servi konpiter. Lezot i esey fer zefor pour pran omwen en repa ansanm sak zour. Pa laranzman ladorasyon fanmir i en bon loportinite pour paran ek zanfan vin pli pros avek kanmarad e pour diskite lo bann size spirityel trankilman ansanm! Si ou met dekote enn erdtan sak semenn pour ladorasyon fanmir sa i en bon konmansman, me pour arive annan bann bon konversasyon ou bezwen fer plis ki sa. Sanmenm sa rezon ou bezwen kominik plis e regilyerman. Avan ki ou zanfan i al lekou, dir li en keksoz ankourazan, diskite teks pour lazournen, oubyen priy ansanm avek li. Si ou fer sa, i kapab ki ou pou ed ou zanfan pas en pli bon lazournen.

⁶ Serten paran in kapab fer serten sanzman dan zot lavi pour kapab pas plis letan avek zot zanfan. Par egzamp, Laura,* en manman ki annan de pti manmay, ti kit en louvraz a plen tan

* Non in ganny sanze.

pour kapab fer sa. I ti dir: “Dan boma-ten nou tou nou ti pe depese pour al travay oubyen lekol. Kan mon ti retourn kot lakour aswar, sa nennenn ti’n fini fer manmay dormi. Lefet ki mon ti kit sa travay, nou ti bezwen viv avek mwens larzan, me mon santi ki mon konn pli byen problem e sa ki pe pase dan lespri mon bann zanfan. Mon ekout sa ki zot dir dan lapriyer e mon kapab gid, ankou-raz e ansenny zot.”

‘PARE POUR EKOUTE’

⁷ Apre ki i ti entervyou en kantite zenn, loter sa liv *For Parents Only* ti remark en lot baryer ki anpes annan bon kominikasyon. Sa de ekriven i dir: “Pre-mye keksoz ki sa bann zenn ti konplent konsernan zot paran ti, ‘Zot pa ekoute.’” Nou pa kapab blanm zis bann paran akoz zot osi zot souvan konplent ki zot zanfan pa ekoute. Pour gard sa bon kominikasyon, sak manm fanmir i bezwen vreman ekout kanmarad.—*Lir Zak 1:19*.

⁸ Paran, eski ou vreman ekout ou zanfan? I kapab difisil pour fer sa sirtou ler ou fatigue oubyen sa konversasyon pa paret enportan. Me petet sa ki pa paret enportan pour ou, i enportan pour ou zanfan. Kan nou dir ki en paran i “pare pou[r] ekoute” sa i vedir ki i pa zis entere-re avek sa ki sa zanfan i dir me i bezwen osi entere-re avek sa ki sa zanfan i santi. Ton lavwa ek zes ki sa zanfan i fer i kapab ed bann paran pour konpran pli byen ki mannyer sa zanfan i santi konsernan sa size ki i pe koz lo la. I osi enportan pour demann kestyon. “Panse en dimoun i parey delo dan en pwi profon, me sa enn ki annan bon zizman i kapab retir li.” (Prov. 20:5, *Today’s English Ver-*

sion) Pour arive fer bann zanfan koz lo bann topik ki zot vwar difisil pour aborde i enportan ki paran i servi bon zizman ek disernman.

⁹ Zanfan eski ou obeir ou paran? Parol Bondye i dir: “Mon garson, ekout disiplin ou papa e pa abandonn lalwa ou manman.” (Prov. 1:8) Zanfan, pa oubliye, ou paran i kontan ou e i annan ou lente-re aker, alor i saz pour ekout e obeir zot. (Efe. 6:1) I pli fasil pour obeir kan i annan en bon kominikasyon e ler ou konnen ki ou paran i kontan ou. Dir ou paran ki mannyer ou santi. Sa pou ed zot konpran ou. Byensir, ou osi ou devret esey konpran zot.

¹⁰ Kot i konsern ekout konsey lezot zenn ki menm laz avek ou, fodre fer byen atansyon. Zot kapab dir ou sa ki ou anvi tande, me zot konsey pa pou ed ou ditou. Anfet, zot menm kapab fer ou ditor. Lefet ki zot napa lasazes ek leksperyans ki en dimoun ki pli aze i annan, laplipar zenn pa get keksoz lwen e akoz sa, zot pa konnen ki konsekans serten aksyon i kapab anmennen plitar. Mazin legzanp Reabam, garson Lerwa Salomon. Kan i ti vin lerwa Izrael, i ti pou’n saz si i ti swiv konsey bann zonm aze. O kontrer, i ti swiv konsey bann zenn ki i ti’n grandi avek. Alor i ti perdi sipor laplipar sitwayen son Rwayonm. (1 Rwa. 12:1-17) Olye imit move latitud Reabam, fer tou sa ki ou kapab pour gard en bon kominikasyon avek ou paran. Koz avek zot lo sa ki ou panse. Swiv konsey ki zot donn ou e aprann pour vin saz parey zot.—Prov. 13:20.

¹¹ Paran si ou pa anvi ou zanfan i rod konsey avek zot bann kanmarad, ou

9. Akoz zanfan i devret ekout zot paran?

10. Ki nou aprann avek sa resi Labib lo Reabam?

11. Kwa ki kapab arive si paran pa abordab?

7. Ki konplent paran ek zanfan i fer?

8. Ki mannyer paran i kapab vreman ekout son zanfan?

devret en dimoun abordab ki fasil pour koz avek. En ser adolesan ti ekrir: “Desito ki mon nonm non en garson, mon paran i mal alez. Sa i fer mwan mal alez osi e mon ezite pour kontinyen koz avek zot.” En lot ser ti ekrir: “En kantite zenn i anvi ganny konsey avek zot paran, me si zot paran pa pran zot o serye, sa bann zanfan pou al rod konsey kot en lot dimoun ki mwen eksperyans.” Si ou pare pour ekout ou zanfan e konpran zot lo nenport topik ki zot anvi koz lo la, ou pou vwar ki zot pou alez pour eksprim zot santiman avek ou e zot pou pare pour swiv ou gidans.

“PRAN LETAN AVAN KOZE”

¹² Kan paran pa kontrol zot lemosyon e azir dan en fason negatif akoz sa ki zot zanfan in dir zot, sa osi i en baryer ki anpes annan en bon kominikasyon. I normal pour bann paran Kretyen anvi protez zot zanfan. Dan sa bann “deryen zour” i annan bokou danze spirityel ek lezot ankor. (2 Tim. 3:1-5) Me, sa ki paran i konsider konman en proteksyon i pa neserman le ka pour zot zanfan.

¹³ Bann paran ki saz pa taye pour eksprim zot lopinyon. I vre ki i pa touzour fasil pour reste trankil kan zanfan i dir ou en keksoz ki fer ou enkyet, me i enportan pour ekout atantivman avan reponn. Salomon, en lerwa byen saz ti ekrir: “Kan en dimoun pe reponn konsernan en size avan ki i’n ekoute, sa i en enbesilite lo son par e i en imilyasyon pour li.” (Prov. 18:13) Si ou reste kalm ou pou konn plis e ou zanfan pou kontinyen eksprim li. Pour kapab arive ed li ou bezwen tann tou sa ki i annan pour dir. I kapab koz “an bonnavini,” e sa i petet

12. Ki mannyer reaksyon paran i kapab vin en lobstak pour kominik avek zot zanfan?

13. Akoz paran i bezwen veye ki zot pa taye pour eksprim zot lopinyon?

en siny ki i konfize. (Zob 6:1-3) Konman bann paran ki kontan ou zanfan, servi ou zorey pour konpran e ou lalang pour geri.

¹⁴ Zanfan, ou osi ou bezwen “pran letan avan koze,” pa taye pour eksprim ou mekontantman kan ou paran i dir ou en keksoz, akoz devan Bondye se zot ki annan sa responsabilite pour elve ou. (Prov. 22:6) I kapab ki zot in eksperyans sa menm sityasyon ki ou pe fer fas avek. Deplis, zot regret fot ki zot in fer ler zot ti ankor zenn e vreman anvi protez ou pour ki ou pa komet menm lerer. Alor, pa konsider ou paran konman ou opozan, me konman ou zanmi, pa konsider li konman ou lennmi me konman ou konseye. (*Lir Proverb 1:5.**) “Respekte [ou] papa ek [ou] manman” e montre zot ki ou kontan zot parey zot kontan ou. Sa pou fer li pli fasil pour zot ‘elve ou dan en ledikasyon ek lenstriksyon Senyer.’—Efe. 6:2, 4.

“PRAN LETAN . . . AVAN PRAN LAKOLER”

¹⁵ Souvan nou pa pran pasyans avek bann dimoun ki nou kontan. ‘Pour bann sen ki reste dan Kolos, ek bann frer fidel Kris,’ zapot Pol ti ekrir: “Bann mari, kontan zot madanm e pa tret zot dir [ou-byen “pran lakoler avek zot,” NW]. Bann paran, pa bezwen provok zot zanfan, sa i kapab dekouraz zot.” (Kol. 1:1, 2; 3:19, 21) Pol ti ankouraz bann Efezyen: “Debaras zot avek tou move santiman, tou iritasyon, tou lakoler. Fer disparet tou kriye ek lensilt.” (Efe. 4:31) Si bann

* **Proverb 1:5:** “En dimoun saz pou ekoute e ganny plis lenstriksyon, e en zonm entelizan i devlop sa abilite pour donn bon gidans.”

14. Akoz zanfan i bezwen pran letan avan koze?

15. Kwa ki pou ed nou pa perdi pasyans e ankoler avek bann dimoun ki nou kontan?

paran i devlop bann laspe fri lespri parey pasyans, ladouser ek kontrol lo zot lekor, sa pou ed zot reste kalm menm kan zot anba presyon.—Gal. 5:22, 23.

¹⁶ Anou pran legzanp Zezi. Zis mazin sa presyon ki i ti santi sa zour swar kan i ti pe pran son dernyen repa avek son bann zapot. Zezi ti konnen ki dan detrw erdtan ankore i ti pou sibir en lanmour martir. Pour ki non son Papa i ganny sanktifye e imen i ganny delivre, tousala ti depan lo son fidelite. Pourtan, i ti pandan sa repa ki bann zapot ti “konmans diskite antre zot lekel parmi zot ki ti pou ganny konsidere pli enportan.” Zezi pa ti kriye oubyen pran lakoler avek zot. O kontrè, avek ladouser, i ti rezonn avek zot. Zezi ti rapel zot ki zot ti’n reste fidel avek li pandan bann moman difisil. Kantmenm Satan ti demande pour sakouy zot parey dible, Zezi ti eksprim konfidans ki zot ti pou reste fidel. I ti menm fer en lalyans avek zot.—Lik 22:24-32.

¹⁷ Bann zanfan osi i bezwen reste kalm. Sirtou kan zot ariv laz adolesan zot kapab ganny sa lenpresyon ki zot paran pe donn zot gidans akòz zot napa konfyans dan zot. Kantmenm parler ou kapab santi koumsa, pa oubliye ki ou paran i enterese avek ou e kontan ou. Si ou pare pour ekout zot e korpere, zot pou respekte ou e konsider ou konman en dimoun responsab. Sa bon latitud pou permet zot donn ou plis liberte dan serten domenn dan lavi. Annan kontrol lo nou lekor i mars ansanm avek lasazes. En proverb saz i dir: “En dimoun bet i tir tou son lakoler, me sa enn ki saz i kontrol li ziska lafen.”—Prov. 29:11.

¹⁶. Ki mannyer Zezi ti reprimann son bann zapot e akòz sa ti remarkab?

¹⁷. Kwa ki pou ed zanfan reste kalm?



Eski ou ekout ou zanfan atantivman?

¹⁸ Alor, paran ek zanfan, pa dekouraze si kominikasyon dan fanmir i pa parey ou ti pou kontan i ete. Kontinyen fer zefor e kontinyen mars dan laverite. (3 Zan 4) Dan nouvo lemonn kot tou dimoun pou parfe zot pou kapab kominik dan en fason parfe. Tou dimoun pou konpran kanmarad e personn pa pou pran lakoler. Me pour lemoman, nou tou nou fer keksoz ki nou regrette apre. Pa ezite alor pour demann leskiz. Touzour pare pour pardonnen. “Reste ini dan lanmour.” (Kol. 2:2) Lanmour i pwisan. ‘Lanmour i pasyan, e i bon. I pa pran lakoler, e i pa gard rankin. Lanmour i pardonn tou, i krwar tou, i esper tou, i siport tou.’ (1 Kor. 13:4-7) Kontinyen devlop lanmour, pour ki i annan en bon kominikasyon, an retour sa pou anmenn lazwa dan fanmir e louanz pour Zeova.

¹⁸. Ki mannyer lanmour i ede pour annan en bon kominikasyon?

Akoz nou lavi i annan en vre bi

RAKONTE PAR PATRICIA SMITH

DESITO ki mon garson Gary ti ne an 1958, mon ti santi ki i ti annan en keksoz mal. Selman, i ti pran dis mwan pour bann dokter dir nou ki i ti gannyen e senk an plitar bann spesyalis Lonni ti konfirm son dyagnostik. Mon ti vreman tris kan mon fiy Louise ti ne ne-v-an apre Gary e li i ti annan bann sentonm pli pir ki pour li.

Dokter ti zantiman dir mwan: “Tou le de ou zanfan i ganny LMBB *syndrome*,* e ou pou bezwen viv avek sa sityasyon.” Sa letan, i ti napa bokou lenformasyon konsernan sa kondisyon zenetik ki rar. Dimoun ki annan sa kondisyon i souvan annan problemm lizye ki kapab fer zot vin aveg, zot vin tro gro, annan ledwa lanmen ouswa lipye an plis, zot retarde dan zot devlopman, i difisil pour zot annan bon kordinasyon, zot ganny dyabet, *osteoarthritis* e zot ronnyon i diformen. Alor, i ti pou en gran defi pour pran swen avek mon de zanfan. En letid ki’n ganny fer tou dernyenman i montre ki 1 dan 125,000 dimoun Langleter i annan sa kondisyon, e bokou plis ankor i annan en form mwen sever sa kondisyon.

ZEOVA I NOU “LANDRWA O KI AN SEKIRITE”

En pe letan apre ki mon ti’n marye, mon ti koz avek en Temwen Zeova e deswit mon ti realize ki i ti pe ansenny laverite dan Labib. Mon msye pa ti entereze ditou. Nou ti bezwen bouz

* Laurence-Moon-Bardet-Biedl *syndrome* ti ganny son non apre kat dokter ki ti eksplike ki en dimoun i ganny sa kondisyon letan ki tou le de son paran i annan menm kalite *gene*. Konmela, bokou i refer avek sa kondisyon konman Bardet-Biedl *syndrome*. Napa gerizon pour sa kondisyon.

en kantite aköz louvraz ki i ti fer, alor i ti difisil pour mwan asosye avek en kongregasyon. Kantmenm sa, mon ti kontinyen lir Labib e priy Zeova. Mon ti vreman ganny rekonforte kan mon ti lir ki “Zeova pou vin en landrwa o ki an sekirite pour nenport ki ki’n ganny oprimen,” e ki “bann ki rod [li] . . . sirman [i] pa pou kit zot.” —Ps. 9:9, 10.

Gary pa ti tro vwar byen kler, alor a laz si-z-an i ti ganny anvoye pour en formasyon spesyalize kot en lekòl o bor lakot sid Langleter. I ti souvan telefonnen pour dir mwan sa ki ti pe enkyet li e mon ti kapab ed li konpran serten prensip Labib lo telefonn. Detrwa lannen apre ki Louise ti ne, mon ti tonm malad. Mon ti ganny *multiple sclerosis* ek *fibromyalgia*. A laz 16 an, Gary ti fini son formasyon e retourn kot lakour. Me, son vizyon ti pe deteryore e an 1975, i ti ganny deklare aveg. An 1977, mon msye ti kit nou.

En pe letan apre ki Gary ti’n retournen, nou ti konmans partisip dan aktivite en kongregasyon ki byen kontan nou e an 1974, mon ti batize. Mon ti vreman kontan kan en frer ti ed Gary konpran son bann devlopman fizik ki i ti pe eksperyans pandan son ladolansans. Lezot Temwen ti ed mwan avek mon louvraz lakour, e avek letan servis sosyal ti swazir senk parmi zot konman nou *carer*. I ti vreman en gran benediksyon sa!

Gary ti kontinyen fer progre dan laverite e i ti batize an 1982. I ti vreman anvi fer pionye asistan. Alor, mon ti deside akonpanyi li dan sa servis e mon ti kontinyen fer li pour plizyer lannen.

En pe letan pli tar, mon garson ti vremen kontan kan sirveyan rezyonal ti demann li, "Akoz ou pa vin en pionye ordiner Gary?" Sanmenm sa kalite lankourazman ki Gary ti bezwen e an 1990 i ti ganny apwente pionye ordiner.

De fwa Gary in bezwen sanz son laans, premye fwa an 1999 e dezyenm fwa an 2008, me problemn lasante Louise ti pli serye. I ti ne aveg e ler mon ti vwar ki i ti annan en ledwa an plis lo enn son lipye, mon ti konnen ki li osi i ti annan LMBB *syndrome*. Bann tes ti montre ki i ti annan bann gro defo avek plizyer son bann lorgann tou. Diran bann lannen ki'n pase, i'n fer en kantite gran loperasyon, enkli senk loperasyon ronnyon. Li osi i annan dyabet parey Gary.

Vi ki i ti konn danze ki ti kapab annan pandan loperasyon, avan loperasyon Louise ti eksplik sirizyen, bann anestezi ek sa lekip ki ti pou ede dan son loperasyon lo son desizyon konsernan pa servi dikan. Akoz sa, i annan en tre bon relasyon avek tou sa bann ki pran byen swen avek li.

EN LAVI KI ANNAN EN BI

Kot nou lakour i touzour annan bann aktivite ki deroule pour ador Zeova. Avan ki bann led elektronik ti disponib, mon ti abitye pas en kantite letan pour lir avek Gary ek Louise. Konmela bann CD, DVD ek lanrezistremans lo www.jw.org i ed nou apresye en program letid baze lo Labib pandan lasemenn antye, diferan ler, e nou kapab partisip byen dan renyon.

Gary i souvan aprann son larepons parker e si i annan en ekspoze dan Lekol Minister Teokratik, i kapab fer li dan son prop mo. I ti ganny

apwente asistan ministeryel an 1995 e i touzour okipe kot Lasal Rwayonm. I akey bann ki pe vin renyon e ede avek sonorizasyon.

Lezot Temwen i akonpany Gary dan predikasyon, souvan zot pous li dan son wilyer ki i servi akoz i ganny *arthritis*. I annan en Temwen ki'n ed li kondwir letid Labib avek en dimoun ki enterese. Gary in osi ankouraz en Kreyen ki ti'n inaktif pour 25 an. Tou le de dimoun i asiste renyon konmela.



Nou vremen rekonesan pour bann laverite presye dan Parol enspire Zeova!

A laz ne-v-an, Louise ti aprann fer krose avek son granmanman ek enn son *career*, e mwan mon ti montre li konman pour brode. Vi ki i ankorkontan koud, i fer bann zoli blennket pour pti baba ensi ki pour bann aze dan kongregasyon. I osi fer bann kart an servan portre lo papye kole. Bann ki ganny sa bann kart i vremen kontan zot. Ler i ti adolesan, i ti aprann tipe. Aprezan, avek led en konpiter ki koze, i souvan kontakte son bann zanmi par imel. Louise ti batize ler i ti annan 17 an. Pandan bann kanpany spezial, nou fer pionye asistan ansanm. Parey Gary, Louise i aprann bann verse parker pour eksprim son lafwa dan promes Bondye kot i pou annan en lemonn kot "lizye bann aveg pou ouver" e "okenn zabitan pa pou dir: 'Mon malad.'"—Iza. 33:24; 35:5.

Nou vremen rekonesan pour bann laverite presye dan Parol enspire Zeova! Nou leker i derborde avek rekonesans pour sa sipor ranpli avek lanmour ki nou gannye avek nou kongregasyon, akoz san zot, nou pa ti pou kapab fer nou bann aktivite. Pli enportan ankore, avek led Zeova, nou lavi i annan en vre bi.



PROTEZ OU LERITAZ PAR FER BANN BON DESIZYON

*“Deteste sa ki mal e
reste atase avek sa ki
byen.”—ROM. 12:9.*

KI OU POU REPONN?

Ki mannyer ou pou dekrir nou leritaz spirityel?

Ki lesou nou aprann avek bann aksyon Ezai?

Ki mannyer nou kapab protez nou leritaz?

BOKOU parmi nou in fer sa bon desizyon pour servi Zeova e swiv legzanp Zezi Kri. (Mat. 16:24; 1 Pyer 2:21) Nou pran nou dedikasyon anver Bondye vreman o serye. Nou ti fer sa swa apre ki nou’n etidye Parol Bondye o profon e non pa akòz en konnesans anler anler lo detrwà verse Labib. Atraver sa letid, nou’n aprann en kantite detay ki ranforsi nou lafwà an rapor avek sa leritaz ki Zeova pou donn sa bann ki aprann ‘konn li konman sel vre Bondye, ek Zezi-Kri ki i’n anvoye.’—Zan 17:3; Rom. 12:2.

² Konman Kreyen nou devret fer bann swa ki fer plezir nou Papa ki dan lesyel. Alor, sa lartik pou egzamin sa bann kestyon enportan: Ki nou leritaz? Ki mannyer nou devret konsider li? Ki mannyer nou kapab fer sir ki nou ganny nou leritaz? Kwa ki pou ed nou fer bann bon swa?

KI NOU LERITAZ?

³ I annan en pti group Kreyen ki pe esper avek enpasyans pour ganny “en leritaz . . . ki pa kapab ni gate, ni sali, ni fletri,” e sa se sa privilez pour renny avek Zezi dan lesyel. (1 Pyer 1:3, 4) Pour ganny sa leritaz, sa bann endividi i bezwen “ne de nouvo.” (Zan 3:1-3) Me ki leritaz sa plizyer milyon ‘lezot mouton’ Zezi ki ed son bann frer swazir pour pres sa bon nouvel lo Rwayonm Bondye? (Zan 10:16) Lezot mouton pou resevwar sa leritaz ki nou premye paran Adan ek Ev pa ti’n zanmen gannyen, zot pou resevwar lavi eternal dan paradi lo later kot pou napa ni soufrans,

1, 2. (a) Ki mannyer ou’n arive fer sa desizyon pour servi Bondye? (b) Ki kestyon nou kapab demande konsernan nou leritaz spirityel?

3. Ki leritaz bann (a) Kreyen swazir e (b) ‘lezot mouton’?

ni lanmor e ni dey. (Rev. 21:1-4) Zezi ti vreman kapab fer sa promes avek sa zonm ki ti akote li lo poto: 'An verite, mon dir ou ozordi, ou pou avek mwan dan paradi.'—Lik 23:43.

⁴ Menm la konmela nou pe benefisyè avek serten laspe nou leritaz. Lefet ki nou egzers lafwa dan sakrifis Zezi, nou annan lape lespri e en relasyon pros avek Bondye. (Rom. 3:23-25) Nou annan en konprezon kler lo bann zoli promes ki dan Parol Bondye. Deplis, nou vreman zwaye vi ki nou form parti en lasosyasyon frer ek ser ki enternasyonal. Pa i en gran privez ki nou en Temwen Zeova! Sanmenm i pa drol ki nou kontan nou leritaz!

⁵ Me, pour gard nou leritaz, fodre nou reste eveye kont bann taktik Satan. Satan in touzour esey enfluyans pep Bondye pour fer bann swa ki kapab fer zot perdi zot leritaz. (Nom. 25:1-3, 9) Vi ki i konnen i reste li en ptigin letan, Satan pe fer plis zefor ankor pour anbet nou. (*Lir Revelasyon 12:12, 17*) Pour kapab kontinyen "reziste kont tou bann riz Dyab," nou devret atoupri apresye nou leritaz. (Efe. 6:11) Dan sa domenn, nou kapab pran aker e tir en leson atraver move legzanp Ezai, premye garson Izaak.

PA BEZWEN VIN PAREY EZAI

⁶ Pros 4,000 an pase, Izaak ek Rebeka ti ganny en zimo ki ti apel Ezai ek Zakob. Anmezir sa zimo ti grandi, zot tanperaman ek zot kalite aktivite ti diferan. "Ezai ti vin en zonm ki ti konn fer lasas, i ti en zonm lakanpanny," tandis ki "Zakob li i [ti] san repros, i ti reste dan latant." (Zen. 25:27) En tradikter Labib apele Robert Alter i dir ki sa mo Ebre ki'n ganny tra-

4. Ki benediksyon nou deza pe gannyen?
5. Ki Satan in esey fer avek pep Bondye e kwa ki kapab ed nou reziste son bann riz?
- 6, 7. Lekel Ezai e ki leritaz i ti kapab gannyen?

dwir "san repros" i "donn sa lide lentegrite oubyen menm linosans."

⁷ Kan Ezai ek Zakob ti annan 15 an, zot granpapa Abraam ti mor, me sa promes ki Zeova ti fer avek Abraam pa ti mor. Plitar, Zeova ti repet sa promes avek Izaak. I ti montre li ki tou bann nasyon lo later ti pou ganny beni atraver desandans Abraam. (*Lir Zenez 26:3-5*.*) Sa promes ti pe montre ki Mesi, sa "desandans" fidel dan Zenez 3:15 ti pou sorti dan fanmir Abram. Konman premye garson Izaak, Ezai ki ti annan drwa legal an rapor avek sa promes. Ezai ti annan en gran privez, pa i vre! Eski i ti kontan sa privez?

⁸ En zour, ler Ezai ti vini sorti dan lakanpanny, i ti vwar Zakob pe "fer en styou." Ezai ti dir: "Depese silvouple, donn mwan en pe sa rouz la, sa rouz ki la akoz mon fatige!" Pour reponn li Zakob ti dir: "Premyerman, vann mwan ou drwa premye ne!" Ki desizyon Ezai ti fer? I ti dir: "Ki valer drwa premye ne i annan pour mwan?" Wi, Ezai ti pli vomye swazir en bol styou dan plas son drwa premye ne! Pour legaliz sa tranzaksyon, Zakob ti ensiste: "Avan tou, fer serman!" San okenn lezitasyon Ezai ti abandonn son drwa konman premye ne. Apre sa, "Zakob ti donn Ezai dipen ek styou lantiy e i ti konmans manze e bwar. Apre sa i ti leve e fer son semen. Dan sa fason, Ezai

* *Zenez 26:3-5*: "Reste konman en etranze dan sa pei, e mon pou kontinyen avek ou e beni ou, akoz avek ou ek ou desandans mon pou donn tou sa pei, e mon pou akonplir sa promes ki mon ti fer avek ou papa Abraam, ⁴ E mon pou multipli ou desandans parey zetwal dan lesyel e mon pou donn ou desandans tou sa pei e par mwayen ou desandans tou nasyon lo later pou ganny beni, ⁵ lefet ki Abram ti ekout mon lavwa e kontinyen respekte son obligasyon anver mwan, mon bann komannman, mon bann regilasyon e mon bann lalwa."

- 8, 9. (a) Ki desizyon Ezai ti fer an rapor avek son leritaz? (b) Plizyer lannen plitar, ki Ezai ti realize konsernan son swa e ki mannyer i ti rezazir?



Pa met ou leritaz spirityel an danze

ti mepriz son drwa konman premye ne.”
—Zen. 25:29-34.

⁹ Plizyer lannen plitar, ler Izaak ti mazin en i ti pros pour mor, Rebeka ti fer en laranzman pour fer sir ki Zakob i ganny sa drwa premye ne ki Ezai ti’n perdi. Kan Ezai ti realize plitar ki i ti’n fer en desizyon bet, i ti sipliy Izaak: “Beni mwan, menm mwan osi, mon papa! . . . Ou pa’n anmas okenn benediksyon pour mwan?” Letan Izaak ti dir li ki i pa ti pou kapab sanz sa benediksyon ki i ti’n fini donn Zakob, “Ezai ti kriye e konmans plere.”
—Zen. 27:30-38.

¹⁰ Ki laspe dan latitud Ezai ki pli evidan dan Labib? I ti demontre ki satisfere son dezir laser ti pli enportan ki bann benediksyon ki i ti pou gannyen atraver

10. Ki mannyer Zeova ti konsider Ezai ek Zakob e akoz?

son leritaz. Ezai pa ti apresye son drwa konman premye ne e i evidan ki i pa ti vremen kontan Bondye. Deplis, Ezai pa ti fatig li avek lefe ki son aksyon ti pou annan lo son desandans. De lot kote, Zakob li i ti apresye son leritaz. Par egzanp, pour swazir en madanm, Zakob ti azir an armoni avek lenstriksyon son paran. (Zen. 27:46–28:3) Anliny avek sa, Zakob ti demontre pasyans ek en leta lespri sakrifis, e sa ti fer li vin en zanset Mesi. Ki mannyer Bondye ti konsider Ezai ek Zakob? Atraver profet Malaki, Zeova ti dir: “Mon ti kontan Zakob, e mon ti ay Ezai.”—Mal. 1:2, 3.

¹¹ Eski dan sa ki Labib i dir lo Ezai i annan en leson pour bann Kreyen ozordi? Definitivman wi. Zapot Pol ti averti son bann konpanyon Kreyen pour fer atansyon ki “personn pa anmenn en lavi imoral e mank respe pour keksoz sakre parey Ezai ki pour en sel repa ti vann son drwa konman en garson premye ne.” (Ebr. 12:16) Sa lavertisman i ankor aplikab pour bann Kreyen. Nou devret touzour demontre lapresyasyon pour bann keksoz sakre pour ki nou pa les nou ganny anvair par bann dezir natir imen ki pou fer nou perdi nou leritaz spirityel. Me, akoz Pol ti pe refer avek fornikasyon an rapor avek aksyon Ezai? Parski parey Ezai, dezir natir imen i kapab fer en dimoun fer fornikasyon e abandonn bann keksoz sakre zis pour li satisfere son bann dezir.

PREPAR OU LEKER LA KONMELA

¹² Konman serviter Zeova, nou definitivman pa oule met nou dan bann

11. (a) Akoz legzanp Ezai i aplikab pour nou konman Kreyen? (b) Akoz Pol ti refer avek fornikasyon an rapor avek aksyon Ezai?

12. (a) Dan ki fason Satan i met tantasyon dan nou semen? (b) Donn bann legzanp dan Labib ki kapab ed nou kan nou annan desizyon difisil pour fer.

sityasyon ki kapab fer nou fer bann kek-soz imoral. Plito, nou priye ki Zeova i pa permet ki nou tonbe kan en dimoun i tant nou pour dezobeir li. (Mat. 6:13) Me, Satan i touzour pe esey afeblir nou spirityalite anmezir nou fer tou pour gard nou lentegrite dan sa lemond koronpi. (Efe. 6:12) Konman bondye sa move lemond, Dyab i konnen ki mannyer i pou eksplwat nou bann dezir enparfe par diriz nou ver bann tantasyon ki souvan marse lo bann imen. (1 Kor. 10:8, 13) Par egzanzp, meton ou dan en sityasyon kot ou annan sa loportinite pour satisfere en kek dezir dan en fason imoral? Ki desizyon ou ti pou fer? Eski ou ti pou parey Ezai e dir: 'Depese, donn mwan!' Ouswa ou ti pou reziste sa tantasyon e tay lwen avek li parey Zozef, garson Zakob ti fer ler i ti pe ganny tante avek madanm Potifar? —*Lir Zenez 39:10-12*.*

¹³ En kantite nou bann frer ek ser in tonm dan bann sityasyon kot zot ti bezwen swazir ant azir parey Ezai ouswa parey Zozef. Laplipar ti azir avek lasazes e rezwir leker Zeova. (Prov. 27:11) Me, kan zot fer fas avek tantasyon, serten konpanyon Kretyen i deside pour azir parey Ezai, zot met zot leritaz spirityel an danze. Anfet, sak lannen, i annan en kantite aksyon disipliner ki ganny pran e bokou dimoun i ganny ekskli akoz limoralite seksyel. Pa i vreman enportan alor pour prepar nou leker la konmela, avan

* *Zenez 39:10-12*: ¹⁰ Alor, i ti arive ki [madanm Potifar] ti koz avek Zozef zour apre zour e [Zozef] pa ti zanmen ekout li pour dormi avek li, e pour reste avek li. ¹¹ E i ti arive ki sa zour, parey lezot zour, i ti antre dan lakaz pour fer son travay, e ni menm enn bann serviter pa ti la dan lakaz. ¹² Alor, [madanm Potifar] ti graponn [Zozef] par son lenz, an dizan: 'Dormi avek mwan!' Me i ti kit son lenz dan lanmen [madanm Potifar], taye e al deor."

13. (a) Dan nou letan, ki mannyer bokou in azir parey Zozef, e ki mannyer serten in azir parey Ezai? (b) Legzanzp bann ki azir parey Ezai i fer nou konsyan kwa?

ki nou trouv nou dan bann sityasyon ki teste nou lentegrite! (Ps. 78:8) Nou kapab pran omwen de pa konman en proteksyon kont tantasyon ki pou ed nou fer bann bon swa plitar.

REFLESIR E RANFORSI

¹⁴ Premye pa i enplik *reflesir lo konsekans nou aksyon*. Nou lapresyasyon pour nou leritaz spirityel i depan bokou lo profonder nou lanmour pour Zeova, sa Enn ki donn sa leritaz. Apre tou, si nou kontan en dimoun, nou pa pou anv i fer li dit. Plito, nou fer tou pour ganny son laprouvasyon. Vi ki sa i le ka, i byen pour pran en pe letan pour reflesir lo konsekans i pou annan lo nou ek lezot si nou les nou dezir imoral fer nou fer pese. Nou devret demann nou lekor: 'Ki mannyer mon aksyon egois pou afekte mon relasyon avek Zeova? Ki lefe mon move aksyon pou annan lo mon fanmir? Ki lefe i pou annan lo mon bann frer ek ser spirityel? Eski mon kapab fer tonbe lezot?' (Fili. 1:10) Nou osi kapab demande: 'Eski satisfere mon dezir pour detruwa minit plezir i kapab ranplas sa lapenn ki mon swa pou anmennen? Eski mon vreman anv i rann lapel parey Ezai ki ti ple-re kan i ti realiz sa ki i ti'n fer?' (Ebr. 12:17) Si nou reflesir lo bann kestyon parey, sa pou ed nou "deteste sa ki mal e reste atase avek sa ki byen." (Rom. 12:9) Wi, lanmour pour Zeova pou sirman motiv nou pour reste atase avek nou leritaz. —Ps. 73:28.

¹⁵ Dezyenm pa i enplik *ranforsi nou defans*. Zeova in fer bokou provizyon pour ranforsi nou defans kont bann faktè dan sa lemond ki kapab en danze pour

14. Ki kestyon nou devret reflesir lo la ki pou ed nou "deteste sa ki mal e reste atase avek sa ki byen"?

15. Kwa ki pou ranforsi nou defans kont bann danze spirityel?



Nou ranforsi nou defans
par rod lasazes Zeova

nou spirityalite. Sa bann provizyon i enplik letid Labib, renyon, predikasyon ek lapriyer. (1 Kor. 15:58) Sak fwa nou devid nou leker avek Zeova dan lapriyer e sak fwa ki nou partisip aktivman dan predikasyon, nou pe ranforsi nou defans kont tantasyon. (**Lir 1 Timote 6:12, 19.**) Ziska en serten degre, se nou zefor ki pou determinen ki degre for nou defans pou ete. (Gal. 6:7) Proverb sapit de i met lanfaz lo sa pwen.

“KONTINYEN ROD LI”

¹⁶ Proverb sapit 2 i ankouraz nou pour rod lasazes ek konprenezon. Sa bann abilite i ed nou pour swazir ant sa ki byen ek sa ki mal, ant kontrol nou lekor e sa-

16, 17. Dan ki fason nou kapab reisi devlop nou abilite pour fer bann bon desizyon?

tisfer zis nou dezir. Pour arive fer sa i tou depan lo nou lanvi pour fer zefor. Pour met lanfaz lo sa laverite, Labib i dir: “Mon garson, *si* ou obei mon parol, apresye mon bann komannman parey en trezor, port latansyon lo lasazes avek ou zorey, afen ki ou a ouver ou leker ver disernman; *si*, an plis ki sa, ou kriy konprenezon e ou fer tande ou lavwa ver disernman, *si* ou kontinyen rod li konmsi larzan, e *si* ou kontinyen rod li konmsi ou pe rod bann trezor kasyet, alor, ou pou konpran ki si sa lakrent pour Zeova, e ou pou trouv konnesans konsernan Bondye. Parski Zeova i donn lasazes; dan son labous i annan konnesans ek disernman.” —Prov. 2:1-6.

¹⁷ Alor, i kler ki pour reisi annan sa abilite ki nou bezwen pour fer bann bon desizyon i depan lo si nou atenn sa bann rekomandasyon ki Proverb i koz lo la. Nou kapab reisi reste ferm kont tantasyon *si* nou les parol Zeova moul sa dimoun ki nou ete anndan, *si* nou persevere dan lapriyer pour ganny gidans Bondye e *si* nou kontinyen rod konnesans Bondye konmsi nou pe rod en trezor kasyet.

¹⁸ Zeova i donn konnesans, konprenezon, disernman ek lasazes sa bann ki fer bokou zefor pour rod sa bann abilite. Pli nou rod e servi zot, nou pou vin pli pros avek Zeova, sa Enn ki donn sa bann abilite. An retour, nou relasyon pros avek Zeova pou konman sa proteksyon kan nou pe ganny tante. Ler nou apros avek Zeova e annan lakrent pour li, sa pou protez nou e anpes nou tonm dan pese. (Ps. 25:14; Zak 4:8) Annou kontinyen annan en lanmitye avek Zeova e aplik lasazes Bondye pour ki nou ava kontinyen fer bann desizyon ki pou fer leker Zeova rezwir e protez nou leritaz.

18. Ki ou determinen pour kontinyen fer e aköz?

Zot ti reste ferm dan “letan maler”

AKOZ zot pa ti pran kote dan bann zafer politik, bann Etidyan Labib ti atir latansyon lemond kan Premye Lager Mondyal ti konmanse an 1914. (Iza. 2:2-4; Zan 18:36; Efe. 6:12) Ki mannyer bann serviter Bondye Grannbretanny ti ganny afekte?

Dapre *Military Service Act* 1916, Grannbretanny ti entrodwir en lwa ki tou zonn selibater 18 a 40 an ti oblize anrezistre dan larme. Sa lalwa ti osi fer en leksepsyon pour bann ki zot “krwayans oubyen standar moral” pa ti permet zot pran par dan lager. Gouvernman ti etabli bann tribinal pour determinen lekel ki pa ti oblize al dan larme.

Pa tro bokou letan apre ki sa lalwa ti’n ganny pase, apepre 40 Etidyan Labib ti ganny mete dan bann prizon militer, e 8 ti’n fini ganny anvoye lo fron batay Lafrans. Akoz sa lenzistis, bann frer Grannbretanny ti ekri en let Premye Minis Herbert Asquith pour proteste kont sa bann lanprizonman. Zot ti osi anvoye en petisyon ki ti annan 5,500 sinyatir.

Apre, dapre lenformasyon, sa wit frer ki ti’n ganny anvoye Lafrans ti’n ganny kondannen a mor akoz zot ti’n refize pran par dan en batay. Me kan sa bann frer ti’n ganny anlinyen pour ganny fiziye, zot kondannasyon ti ganny ranplase par en santans di-z-an prizon. Zot ti ganny reanvoye Langleter e fer zot santans dan bann prizon sivil.

Anmezir ki lager ti kontinyen, lalwa ti obliz bann zonn marye pour osi pran par dan lager. En ka enportan konsernan en dokter e Etidyan Labib ki ti apel Henry Hudson ti pas ankour Manchester, Langleter. Lakour ti pas zizman lo li le 3 Out 1916 konmkwa i ti’n fer en keksoz ilegal par refize pran par dan lager. Lakour ti fer li pey en lanmann e refer li avek lotorite militer. An menm tan, en lot ka ki ti parey pour Henry Hudson, ti ganny pase ankour Edinburgh, Lekos. James Scott, en pionye ki ti annan 25 an ti ganny trouve inosan. Lakour ti fer rapel me apre aksepte sa zizman, zot ti dakor avek en lot ka ki ti pe pas ankour Lonn. Safwasi, en frer ki ti apel Herbert Kipps ti ganny trouve kou-pab, i ti bezwen pey en lanmann e i ti ganny refer avek lotorite militer.

Ver Septanm 1916, 264 frer ti’n fini anvoye zot laplikasyon pour pa pran par dan lager. Parmi sa bann frer, 5 laplikasyon ti ganny aksepte, 154 ti ganny kondannen pour fer travay forse, 23 ti ganny anvoye dan larme kot zot ti pou travay dan en group ki pa ti al lo fron batay e 82 ti ganny refer avek lotorite militer pour ganny zize. Manm piblik ti proteste kont lafason ki sa bann frer ti ganny trete dan sa bann prizon militer, e akoz sa, gouvernman ti bezwen transfer zot dan bann prizon sivil.



Henry Hudson



James Scott



Pryce Hughes



Prizon Dartmoor,
kot bokou Etidyan
Labib ti ganny anprizonnen



Herbert Senior

Pryce Hughes ki plitar ti vin sirveyan Biro Brans Grannbretanny ek Edgar Clay ti ganny anvoye Wales pour travay dan konstriksyon danm. De lot kote, Herbert Senior, enn parmi sa wit frer ki ti'n ganny reanvoye sorti Lafrans ti ganny met dan prizon Wakefield, Yorkshire. Lezot frer ti ganny anvoye prizon Dartmoor kot zot ti bezwen fer bann gro louvraz dan bann kondisyon kriyel e zot ti sa pli gran group dimoun ki zot konsyans pa ti permet zot pran par dan lager.

Frank Platt, en Etidyan Labib, ki ti dakor pour fer travay larme me ki pa ti oblize pran par dan bann konba ti ganny persekite zanmen fini kan zot ti anvoy li lo fron batay. Menm keksoz ti ariv avek Atkinson Padgett, ki ti aprann laverite zis apre ki i ti'n anrezistre dan larme, akoz i ti refize pran par dan bann konba.

Menm si dan sa letan nou bann frer pa ti tro konpran kwa ki enplike pour pa pran kote dan zafer politik, zot ti determinen pour fer pleziz Zeova. Bann frer ki'n ganny mansyonnen par non dan sa lartik in kit en bon legzanp lo konman pour pa pran kote dan bann zafer politik e konman pour reste ferm dan "letan maler." (Rev. 3:10)—Dan nou arisiv Grannbretanny.



Frank Platt



Ou kapab download
sa magazin ek lezot
piblikasyon ki disponib
lo www.jw.org



Ou osi kapab lir
New World Translation
lo sa sit

Scan code
ouswa al lo
www.jw.org



w13 05/15-SC